

曹松詩集卷第二

九江送方干歸鏡湖

一檣懸五兩此日動歸風客路拋湓口家林入

鏡中譚餘雲出嶠詠苦月欹空更若看鷓鴣一作遊支

鳥何人夜坐同

廬山訪賈匡

西城疾病日此地少尋君古跡春猶在遙泉夜
盡聞片時三處雨九疊幾重雲到者皆忘寐精
神與俗分

顧少府池上

一作顧少府池亭葺

池上分行種公庭覺少塵根離潮水岸韻爽判
曹人正午迴魚影方昏息鷺身無時不動詠滄
島思方頻

喜友人歸上元別業

一檣千里外隱者興宜孤落日長邊海秋風滿
故都掩關苔色老盤逕葉聲枯匡岳來時過遲
迴絕頂無

曲江暮春雪霽

霽動江池色春殘一去游菰風生馬足槐雪滴
人頭北闕塵未起南山青欲流如何多別地却

得醉汀洲

立春日

春飲

一作日

一杯酒便吟春日詩木梢寒未覺地脉

暖先知鳥嘯星沈後山分雪薄時賞心無處說

悵望曲江池

一作寧無翦花
手贈與最芳枝

宿溪僧院

年少雲溪裏禪心夜更閑煎茶留靜者靠月坐
蒼山露白鍾尋定螢多戶未關嵩陽大一作有石室
何日譯經還

石頭懷古

日月出又沒臺城空白雲雖寬百姓土漸缺六
朝墳禾黍是亡國山河歸聖君松聲驟雨足幾
寺晚鍾聞

浙右贈陸處士

靜節灌園餘得非成隱居長當庚子日獨拜五
經書白浪吹亡國秋霜洗大虛門前是京口身
外不營儲

哭胡處士

丘中久不起將謂詔書來及見凌雲說方知掩
夜臺白衣歸北路玄造亦遺才世上亡君後詩

聲更大哉

贈餘干袁明府

一雨西成色一作城邑陶家心自清山銜中郭分雲卷
下湖程公署聞流水人煙入廢城難忘楚盡處
新有越吟生

贈雷鄉張明府

任官征戰後度日寄閑身封卷還高客飛書問
野人廢田教種穀生路遣尋薪若起柴桑興無
先漉酒中

岳陽晚泊

輕帆下闊流便泊此沙洲湖影撼山朶日陽燒
野愁白波爭起倒青嶼或沈浮是際船中望東
南仞仞一作萬里秋

覽春榜喜孫鄴成名

門外報春榜君天子知舊愁渾似雪見日揔
消時塔下牡丹氣江頭楊柳絲風光若有分無
處不相宜

己亥歲二首僖宗廣明元年

澤國江山入戰圖生民何計樂樵蘇一作漁憑君莫
話封侯事一將功成萬骨枯

傳聞

一作波間

一戰百神愁兩岸疆兵過未休誰道滄

江揔無事近來長共血爭流

亂後入洪州西山

寂寂陰溪水漱苔塵中將得苦吟來東峯道士
如相問縣令一作尉而今不姓梅

送僧入廬山

若到江州二林寺遍遊應未出雲霞廬山瀑布
三千仞畫破青霄始落斜

送僧入蜀過夏

師言結夏入巴峯雲水迴頭幾萬一作凡幾重五月峨

眉須近火木皮領重一作額裏只如冬

江西逢僧省文

閩地高僧楚地逢伴遊蠻錫挂垂松白雲逸性
都無定纜出雙峯愛五峯

高僧不負雪峯期却伴青霞入翠微一作七葉巖

前霜欲降九枝松上鶴初歸風生碧澗魚龍躍

威一作錫振金樓鸞雀飛想得白蓮花上月滿山猶

帶舊光輝

水精念珠

等量紅縷貫晶熒盡道勻圓別未勝鑿斷玉潭

盈尺水琢成金地兩條冰輪時祇恐星侵佛掛

處常疑露滴僧幾度夜深尋不着瑠琬為殿月

為燈

南海旅次

憶歸休上越王臺歸思臨高不易裁為客正當

一作逢無鴈處故園誰道有書來城頭蚤角吹霜盡

郭裏殘潮蕩一作帶月回心似百花閑未得年年爭

發一作向被春催

春草

不獨滿池塘夢中佳句香春風有餘力引上古

城墻

金谷園

當年歌舞時不說草離離今日歌舞盡滿園秋
露垂

夏日東齋

三庚到秋伏偶來松檻立熱少清風多開門放
山入

南朝

三籬一作離離蓋馳道風烈一無取時見牧牛童嗔牛
喫禾黍

言懷

出山不得意謁帝值戈鋌豈料為文日翻成用
武年

寒食日題杜鵑花

一朵又一朵併開寒食時誰家不禁火總在此
花枝

鍾陵寒食日郊外閑遊

可憐時節足風情杏子粥香如冷錫無奈春風
輸舊火遍教人喚作山櫻

中秋對月

無雲世界秋三五共看蟾盤上海涯直到天頭
天盡處不曾私照一人家

陪河南李中丞宴隱溪湖璋

竹林蹄鳥不知休一作秋羅列飛橋水亂流觸一作飄散

柳絲回玉勒約開蓮葉上蘭舟酒邊舊侶真何

遜雲一作歌裏新聲是莫愁若值主人嫌晝短應陪

秉燭夜深遊

別湖上主人

門繫釣舟雲滿岸借君幽致坐移旬湖村夜叫
白蕪鴈菱市曉喧深浦人遠水日邊重作雪寒

林燒後別生春不辭更住醒還醉太乙東峯歸

夢頻

贈廣宣大師

憶昔同遊紫閣雲別來三十二回春白頭相見
雙林下猶是清朝未退人

鍾陵寒食日與同年裴顏李先輩鄭校

書郊外閑遊

寒節鍾陵香騎隨同年相命楚江湄雲間影過
鞦韆女地上聲喧蹴鞠兒何處寄煙歸草色誰
家送火在花枝銀瓶冷酒皆傾盡半臥垂楊自

不知

江外除夜

千門庭燎照樓臺總為年光急急催半夜臘因
風卷去五更春被角吹來寧無好鳥思花發應
有遊魚待凍開不是多歧漸平穩誰能呼酒祝
昭回

七夕

牛女相期七夕秋相逢俱喜鵲橫流彤一作寒雲縹
緲迴金輅明月嬋娟掛玉鈎翠一作燕羽幾曾添別
恨花容終不更含羞更殘便是分襟處曉箭東

來一作南射翠樓

羅浮山下書逸人壁

海上亭臺山下煙買時幽邃不爭錢莫言白日
催華髮自有丹砂駐少年漁釣未歸深竹裏琴
壺猶戀落花邊可中更踐無人境知是羅浮第
幾天

天台瀑布

萬仞得名云瀑布遠看如織掛天台休疑寶尺
難量度直恐金刀易翦裁噴向林梢成夏雪傾
來石上作春雷欲知便是銀河水墮落人間合

却迴

桂江

未識佳人尋桂水
水雲先解傍壺觴
筍林次第添班竹
雛鳥參差護錦囊
南中有錦囊鳥
乳洞此時連越井
石樓何日到仙鄉
如飛似墮皆青壁
畫手不強元化強

南海

傾騰界漢沃諸蠻
立望如何英華作何如
畫此看無地
不同方覺遠共天
無別始知寬
文魴隔霧朝含碧
老蚌凌波夜吐丹
萬狀千形皆得意
長鯨獨

自轉身難

洞庭湖

東西南北各連空
波上唯留小朶峯
長與岳陽翻鼓角
不離雲夢轉魚龍
吸迴日月過千頃
鋪盡星河剩一重
直到劫餘還作陸
是時應有羽人逢

霍山

在龍川縣

七千七百七十丈
丈丈藤蘿勢入天
未必展來空似翅
不妨開去又成蓮
月將河漢分巖轉
僧與龍蛇共窟眠
直是畫工須閣筆
況無名畫可

一作西土文殊曾印
迹大中皇帝舊衣禪

流傳

巫峽

巫山蒼翠峽一作夾通津下有仙宮楚女真不逐彩
雲歸碧落却爲暮雨撲行人年年舊事音容在
日日誰家夢想頻應是荆山留不住至今猶得
覩芳塵

送陳樵校書歸泉州

巨塔列名題詩心亦罕齊除官京下闕乞假海
門西別席侵殘漏歸程避戰輦關遙秦鴈斷家
近瘴雲低候馬春風館迎船曉月溪帝京須蚤

入莫被刺桐迷

贈鏡湖處士方干二首

包含教化剩搜羅句出東甌奈峭何世路不妨
平處少才人唯是屈聲多雲來島上便幽石月
到湖心忌白波後輩難爲措機杼先生織字得
龍梭

祇擬應星眠越絕唯將麗什當高勳磨礱清濁
人難會織絡虛無帝亦聞鳥道未知山足雨漁
家已沒鏡中雲他時莫爲三徵起門外沙鷗解
笑君

曹林詩二
拜訪陸處士

萬卷書邊人半白再來惟恐降玄纁性靈比鶴
爭多少氣力登山較幾分吟鬢漸無前度漆寢
衣猶有昨宵雲將知谷口耕煙者低視齊梁楚
趙君

嶺南道中

百花成實未成歸未必歸心與志違但有壺觴
資逸詠盡交風景入清機半川陰霧藏高木一
道晴蜺雜落暉遊子馬前芳草合鷓鴣啼歇又
南飛

春日自吳門之陽羨道中書事

勝異恣遊應未遍路歧猶去幾時還浪花湖闊
虹蜺斷柳線村深鳥雀閑千室綺羅浮畫檝兩
州絲竹會茶山眼前便是神仙事何必須言洞
府閒

將入關行次湘陰

背顧秦城在何處圖書作伴過湘東神鷗亂噪
黃陵近候鴈斜沈夢澤空打槳天連晴水白燒
田雲隔夜山紅也知漸老巖棲隱爭奈文闈有
至公

曹松詩三
題昭州山寺常寂上人水閣

常寂常居常寂裏年年月月是空空
堦前未放巖根斷屋下長教海眼通
本爲入來尋佛窟不期行處踏龍宮
地時憶着堪圖畫一朵雲山二水中

廣州貽匡緒法師

口宣微密不思議不是除貪即誠癡
祇待外方緣了日爭看內殿詔來時
週迴海樹侵階疾迢遞江潮應井遲
必竟懶過高坐寺未能全讓法雲師

贈道人

住山因以福爲庭便向山中隱姓名
闔苑駕將雕羽去洞天贏得綠毛生
日邊腸胃餐霞火月裏肌膚飲露英
顧我從來斷浮濁擬驅雞犬上三清

送乞雨禪師臨遇南遊

活得枯樵耕者知巡方又欲向天涯
珠穿闔國菩提子杖把靈峯柳栗枝
春蘚任封降虎石夜雷從傍養龍池
生緣在地南浮去自此孤雲不可期

南海陪鄭司空遊荔園

荔枝時節出旌旂南國名園盡與遊
亂結羅紋照襟袖別含瓊露爽咽喉
葉中新火欺寒食樹上丹砂勝錦州
他日爲霖不將去也須圖畫取風流

李郎中林亭

祇向砌邊流野水樽前上下看魚兒
笋蹊已長過人竹藤徑從添拂面絲
若許白猿垂近戶即無紅菓壓低枝
大才必擬逍遙去更遣何人佐盛時

夜飲

良宵公子宴蘭堂濃麝薰人獸吐香
雲帶金龍銜畫燭星羅銀鳳瀉瓊漿
滿屏珠樹開春景一曲歌聲遶翠梁
席上未知簾幕曉青娥低語指東方

駙馬宅宴罷

粉墻殘月照宮祠宴闋銀瓶一半欹
學語鸞兒飛未穩放身斜墜綠楊枝

弔建州李貞外

銘旌歸故里猿鳥亦悽然已葬桐江月
空迴建

水船客傳爲郡日僧說讀書年恐有吟魂在深山古木邊

弔李翰林

李白雖然成異物逸名猶與萬方傳昔朝曾侍
玄宗側大夜應歸賀監邊山木易高迷故壠國
風長在見遺篇投金渚畔春楊柳自此何人繫
酒船

山中

要路豪家非往還巖門先有不曾關衆心惟恐
地無剩吾意亦憂天惜閑白練曳泉窻下石絳

羅垂果枕前山樵夫豈解營生業貴欲自安麋
鹿間

山寺引泉

劈碎琅玕意有餘細泉高引入香厨山僧未肯
言根本莫是銀一作秋河漏泄無

友人池上詠蘆

秋聲誰種得蕭瑟在池欄葉澁栖蟬穩叢疎宿
鷺難斂煙宜下颯吹省先寒此物生蒼島令
人憶釣竿

商山

垂白商於原下住兒孫共死一身忙木弓未得
長離手猶與官家射麝香

荆南道中作

十月荒郊雪氣催依稀愁色認陽臺遊秦分繫
三條燭出楚心殊一寸灰高柳莫遮寒月落空
桑不放夜風迴如何住在猿聲裏却被禪吟引
下來

武德殿朝退望九衢春色

玉殿朝初退天街一看一作望春南山初過雨北闕
淨無塵夾道天桃滿連溝御柳新蘇舒同舜澤

煦嫗並堯仁佳氣浮軒蓋和風襲縉紳白茲憐

一作知萬物同入發生辰

弔北邙

山下望山上夕陽看一作明又曛無人醫白髮少地
着新墳歲代殊相遠賢愚旋不分東歸聊一弔
亂木倚寒雲

及第勅下宴中獻座主杜侍郎

得召丘墻淚却頻若無公道也無因門前送勅
朱衣吏席上啣盃碧落人半夜笙歌教泥一作洗月
平明桃杏放燒春南山雖有歸溪路爭那酬恩

未殺身

乙卯十一月二十三日校李鈔本次第首同異字之少
惟無此補遺四首耳 增補記

補遺

梢雲

殊質資靈貺陵空發瑞雲梢梢含樹彩一作影郁郁
動霞文不比因風起全非觸石分葉光閑泛灩
枝彩靜氛氲隱見心無宰徘徊慶自君翻飛如
可託長願在橫汾

白角簾

角簾工夫已到頭夏來全占滿床秋若言保惜
歸華屋祇合封題寄列侯學卷曉冰長怕綻解

鋪寒水不教流蒲桃錦是瀟湘底曾得王孫價
倍酬

碧角簾

細皮重疊織霜紋滑膩鋪床勝錦茵八尺碧天
無點翳一方青玉絕纖塵蠅行只恐煙黏足客
臥渾疑水浸身五月不教炎氣入滿堂秋色冷
龍鱗已上見文苑英華

滕王閣春日晚望

凌春帝子閣偶眺日移西浪勢平花塢帆陰上

柳堤

見唐詩類苑

李永相詩集目錄

卷上

隴

西

李

建敷

詩四十四首

中酒寄劉行軍

白鴈

早春寄懷

春日東山正堂作

春日小園晨看兼招同舍

惜花寄

負外

春日病中

毆妓

踏青罇前

正月晦日

惜花

金谷園落花

柳花寄宋明府

李永相詩目

曹松詩

共

送人

閑遊

栢梁隔句韻詩

贈趙學士

春陰

春日金谷園

夏日酬祥松二公見訪

懷贈操禪師

閑居秋思呈祥松二公

賦得冬日青溪草堂四十字

溪齋 留題敬愛寺 小園 宿山房

金陵所居青溪草堂閑興

宿山房 題愛敬寺

五字小字並行

闕下寄孫負外

寄魏郎中

病中書懷寄王二十六

採菊 送王郎中之官吉水

孤鷹 贈送致仕郎中

宿友人山房寄司徒相公二首

感故府二首 田家三首

新竹 歸燕詞

卷下

詩四十一首

題魏壇二首 東樓看雪

落花

春雪

重戲和春雪

春日罇前示從事

罇前

薔薇二首

殘牡丹

春雨二首

醉中惜花更書與諸從事

和判官喜雨

離闕下日感恩

細雨遙懷故人

春水

蝶

中春寫懷寄沈員外

鍾山寺避暑勉二三子

道林寺

和致仕沈郎中

醉中詠梅花

閑出書懷

寺居陸處士相訪感懷却寄二三友人

春雪

惜花

梅花寄所親

登昇元閣

雪有作

宮詞

晚春送牡丹

歲暮晚泊望廬山不見因懷岳僧呈察

判

重臺蓮

迎神

春詞

獨夜作

竹

清明日

宮詞

李丞相詩集目錄

瞿良士家藏書棚本付諸影印見昭一帙取校
此刻字句都同唯敬愛寺及宿山房二首次第稍
異耳 戊午四月三十日增湘記

李丞相詩集卷上

隴西李 建勳

詩四十四首

中酒寄劉行軍

甚矣頻頻醉神昏體亦虛肺傷徒問藥髮落不
盈梳戀寢嫌明室修生媿道書西峯老僧語相
勸合何如

白鴈

東溪一白鴈毛羽何皎潔薄暮浴清波斜陽共
明滅差池失羣久幽獨依人旅食賴菰蒲單

栖怯霜雪邊風昨夜起顧影空哀咽不及墻上
烏相將繞雙闕

早春寄懷

家山歸未得又是看春過老覺光陰速閑悲世
路多風和吹岸柳雪盡見庭莎欲向東溪醉狂
眠一放歌

春日東山正堂作

身閑贏得出天氣漸喧和蜀馬登山穩南朝古
寺多早花微弄色新酒欲生波從此唯行樂閑
愁奈我何

春日小園晨看兼招同舍

最有杏花繁枝枝若手搏須知一春促莫厭百
迴看鳥轉風潛息蜂遲露未乾可容排飲否兼
折贈頭冠

惜花寄

負外一本缺
孫字

朝始一枝開暮復一枝落只恐雨淋漓又見春
蕭索侵晨結駟携酒徒尋芳踏盡長安衢思量
少壯不自樂他日白頭空歎吁

春日病中

纔得歸閑去還教病卧頻無由全勝意終是負

青春綠柳漸拂地黃鶯如喚人方爲醫者勸斷
酒已經旬

毆妓

自爲專房甚忽忽有所傷當時心已悔徹夜手
猶香恨枕堆雲髻啼襟搵月黃起來猶忍惡剪
破繡鴛鴦

踏青罇前

期君速行樂不要旋還家永日雖無雨東風自
落花詩毫粘酒淡歌袖向人斜薄暮忘歸路垂
楊噪亂鴉

正月晦日

莫倦尋春去都無百日遊更堪正月過已是一
分休泉暖聲纔出雲寒勢未收晚來重作雪翻
爲杏花愁

惜花

白髮今如此紅芳莫更催預愁多日謝翻怕十
分開點滴無時雨荒涼滿地苔閑堦一盃酒惟
待故人來

金谷園落花

一本缺
谷字

愁見清明後紛紛蓋地紅惜看難過日自落不

因風蝶散餘香在鶯啼半樹空堪悲一樽酒從此似西東

柳花寄宋明府

一作寄人

每愛江城裏青春向盡時一迴新雨歇是處好風吹破石粘蟲網高樓撲酒旗遙知陶令宅五樹正離披

送人

相見未逾月堪悲還別離非君誰顧我萬里又南之雨逼清明日花陰杜宇時愁看掛帆處鷗鳥共遲遲

閑遊

携酒復携觴朝朝一似忙馬諳頻到路僧借舊眠床道勝他圖薄身閑白日長扁舟動歸思高處見滄浪

栢梁隔句韻詩

不喜長亭柳枝枝擬送君惟憐北窓
樹樹解留人圓缺都如月東西只似雲愁看離席散歸蓋動行塵

贈趙學士

常欽趙夫子遠作五侯賓見面到今日操心如

古人醉同華席少吟訪野僧頻寂寂長河畔荒
齋與廟鄰

春陰

老雨不肯休東風勢還作未放草蒙茸已遣花
蕭索浮生何苦勞觸事妨行樂寄語達生人須
知酒勝藥

春日金谷園

一本缺
谷字

火急召親賓歡遊莫厭頻日長徒似歲花過即
非春晚雨來何定東風自不勻須知三箇月不
是負芳晨

夏日酬祥松二公見訪

多謝空門客時時出草堂從容非有約淡薄不
相忘池映春篁老簷垂夏果香西峯正清霽自
與拂吟床

懷贈操禪師

嘗憶曹溪子龕居面碧嵩杉松新夏後雨雹夜
禪中道匪因經悟心能向物空秋來得音信又
在剡山東

閑居秋思呈祥松二公

秋光雖即好客思轉悠哉去國身將老流年應

又來葉紅堆晚徑菊冷藉空壘不得師相訪難
將道自開

賦得冬日青溪草堂四十字

莫道無幽致常來到日西地雖當北闕天與設
東溪踈葦寒多折驚鳧去不齊坐中皆作者長
愛覓分題

溪齋

水木遶吾廬寒簾晚檻虛衰條寒露鵲幽果落
驚魚愛酒貧還甚趨時老更踈垂慵自有素不
是忽簪裾

小園

小園吾所好栽植忘勞形晚果經秋赤寒蔬近
社青竹籬荒引蔓土井淺生萍更欲從人勸憑
高置草亭

金陵所居青溪草堂閑興

窓外皆連水杉松欲作林自憐趨競地獨自愛
閑心素壁題看徧危冠醉不簪江僧暮相訪簾
卷見秋岑

宿山房

石窓燈欲盡松檻月還明就枕渾無睡披衣却

此首在溪齋後小園前

出行巖高泉亂滴林動鳥時驚
倏忽山鐘曙喧喧僕馬聲

宿題愛敬寺

野性竟未改何以居朝廷
空爲百官首但愛千峯青
南風新雨後與客携觴行
斜陽惜歸去萬壑啼鳥聲

闕下偶書寄孫負外

長安駟馳地貴賤共悠悠
白日誰相促勞生日不休
鳳翔雙闕曉蟬噪六街秋
獨有南宮客時來話釣舟

寄魏郎中

碌碌但隨羣蒿蘭任不分
未嘗矜有道求遇向吾君
逸駕秋尋寺長歌醉望雲
高齋紙屏古塵暗北山文

病中書懷寄王二十六

落葉滿山州閑眠病未瘳
窓陰連竹枕藥氣染茶甌
路匪人遮去官須覓休焉
宜更羸老杖作公侯

採菊

簇簇竟相鮮一枝開幾番
味甘資麴蘖香好勝

蘭蓀古道風搖遠荒籬露壓繁盈筐時採得服
餌近知門

送王郎中之官吉水

南望廬陵郡山連五嶺長吾君憐遠俗從事輟
名郎移戶多無土春蠶不滿筐惟應勞贖畫溪
峒況強梁

孤鷹

欲食不敢食合栖猶未栖聞風亦驚過避繳恨
飛低水闊緣湘困雲寒過磧迷悲鳴感人意不
見夜烏啼

贈送致仕郎中

鶴立瘦稜稜髭長白似銀衣冠皆古製氣貌異
常人聽雪添詩思看山滯酒巡西峯重歸路唯
許野僧親

宿友人山居寄司徒相公

雨雪正霏霏令人不憶歸地爐僧坐暖山枿火
聲肥隔紙烘茶蘂移鐙剥芋衣知君在霄漢此
興得還稀

又

郢客相尋夜荒庭雪灑篙高虛堂看向曙吟坐共

忘勞溪凍聲全減燈寒焰不高他人莫相笑未
易會吾曹

感故府二首

戚戚復戚戚期懷安可釋百年金石心中路生
死隔新墳應草合舊地空苔色白日燈熒熒凝
塵滿几席

悒悒復悒悒思君安可及永日在堦前披衣隨
風立高樓暮角斷遠樹寒鴉集惆悵幾行書遺
蹤墨猶濕

田家三首

畢歲知無事兵銷復舊丁竹門桑徑狹春日稻
畦青犬吠隈籬落雞飛上碓程歸田起思蛙
叫草冥冥

不識城中路熙熙

有年木槃擎社酒瓦鼓送

鼓

神錢霜落牛歸屋禾收雀滿田遙陂過秋水閑
閣釣魚船

長愛田家事時時欲一過垣籬皆樹槿廳院亦
堆禾病果因風落寒蔬向日多遙聞數聲笛牛
晚下前坡

新竹

裊裊薰風軟娟娟湛露光參差仙子仗迤邐羽
林槍迥去侵花地斜來破蘚墻籜乾猶抱翠粉
膩若塗裝逕曲莖難數陰踈葉未長嬾嫌吟客
倚甘畏夏蟲傷映水如爭立當軒自着行北亭
罇酒興還爲此君狂

歸燕詞

羽翼勢雖微雲霄亦可期飛翻自有路鴻鵠莫
相嗤待侶臨書幌尋泥傍藻池衝人穿柳逕捕
蝶遶花枝廣厦來應遍深宮去不疑雕梁聲上
下煙浦影參差舊地人潛換新巢雀謾窺雙雙

暮歸處踈雨滿江湄

李丞相詩集卷上

臨安府洪橋子南河西岸陳宅書籍鋪印

李丞相詩集卷下

隴西李建勳

詩四十一首

題魏壇二首

不遇至真傳道要曾看真誥亦何爲舊碑經亂
沉荒澗靈篆因耕出故基蛙黽自喧澆藥井牛
羊閑過放生池蕭條夕景空壇畔朽檜枝斜綠
蔓垂

一尋遺跡到仙鄉雲鶴沉沉思渺茫丹井歲深
生草木芝田春廢卧牛羊雨淋殘畫摧荒壁鼠

引飢虵落壤，樛薄暮欲歸。仍佇立，菖蒲風起水
泱泱。

東樓看雪

一上高樓醉復醒，日西江雪更冥冥。化風吹火
全無氣，平望惟松劣。一作露青臘內不妨南地少
夜長應得小窗聽，因思舊隱匡廬日。閑看杉檉
掩石扃。

落花

惜花無計又花殘，獨遶芳叢不忍看。暖艷動隨
鶯翅落，冷香愁雜燕泥乾。綠珠倚檻魂初散，巫

峽歸雲夢又闌，忍把一罇重命樂。送春招客亦
何歡。

春雪

南國春寒朔氣迴，霏霏還阻百花開。全移暖律
何方去，似悞新鶯昨日來。平野旋銷難蔽草，遠
林高綴却遮梅。不知金勒誰家子，只待晴明賞
帝臺。

重戲和春雪寄沈負外

誰道江南要雪難，半春猶得倚樓看。却遮遲日
偷鶯暖，密灑西風借鶴寒。散漫不容梨艷去，一作出

輕明應笑玉華乾和來瓊什雖無敵且是儂家
比興殘

春日罇前示從事

州中案牘魚鱗密界上軍書竹節稠眼底好花
渾似雪甕頭春酒漫如油東君不爲留遲日清
鏡唯知促白頭最覺此春無氣味不如庭草解
忘憂

罇前

官爲將相復何求世路多端早合休漸老更知
春可惜正歡唯怕客難留雨催草色還依舊晴

放花枝始自由莫厭百壺相勸倒免教無事結
閑愁

薔薇二首

萬蕊爭開照檻光詩家何物可相方錦江風撼
雲霞碎仙子衣飄黼黻香裊露早英濃壓架背
人狂蔓暗穿墻綵牋蠶榼旬休日欲召親賓看
一場

拂簷拖地對前墀蝶影蜂聲爛熳時萬倍馨香
勝玉蕊一生顏色笑西施忘歸醉客臨高架恃
寵佳人索好枝將並舞腰誰得及惹衣傷手盡

從伊

殘牡丹

腸斷題詩如執別芳茵愁更繞欄鋪風飄金蕊
看全落露滴檀英又暫蘇失意婕妤粧漸薄背
身妃子病難扶迴看池館春休也又是迢迢看
畫圖

春雨二首

春霖未免妨遊賞唯到詩家自有情花徑不通
新草合蘭舟初動曲池平淨綠高樹莓苔色飢
集虛廊燕雀聲閑憶昔年爲客處悶留山館阻

行行

蕭蕭春雨密還踈景象三時固不如寒入遠林
鶯翅重暖抽新麥土膏虛細濛臺榭微兼日潛
漲漣漪欲動魚唯稱垂慵多睡者掩門中酒覽
閑書

醉中惜花更書與諸從事

公退尋芳已是遲莫因他事更來稀未經旬日
唯憂落筭有閑時不合歸歌檻宴餘風裏裏閑
園吟散雨霏霏高樓鼓絕重門閉長爲拋迴恨
解衣

和判官喜雨

去禱山川尚未還雲雷尋作遠聲寒人情便似
秋登悅天色休勞夜起看高檻氣濃藏郭小
庭流擁沒花壇須知太守重墻內心極農夫望
處歡

離闕下日感恩

二年塵冒處中台喜得南歸退不才即路敢期
皇子送出關猶有御書來未知天地恩何報翻
對江山思莫開斜日葦汀凝立處遠波微颺翠
如苔

細雨遙懷故人

江雲未散東風暖溟濛正在高樓見細柳綠堤
少過人平蕪隔水時飛燕我有近詩誰與和憶
君狂醉愁難破昨夜南窻不得眠閑堦點滴迴
燈坐

春水

萬派爭流雨過時晚來春靜更逶迤輕鷗散遶
夫差國遠樹微分夏禹祠青岸漸平濡柳帶舊
溪應暖負尊絲風鬟倚檝誰家子愁看鴛鴦望
所之

蝶

粉蝶翩翩若有期
南園長是到春歸
閑依柳帶參差起
困傍桃花獨自飛
潛被燕驚還散亂
偶因人逐入簾幃
晚來欲雨東風急
迴看池塘影漸稀

中春寫懷寄沈彬員外

省從騎竹學謳吟
便殫光陰役此心
寓目不能閑一日
閉門長勝得千金
窻懸夜雨殘燈在
庭掩春風落絮深
唯有故人同此興
近來何事懶相尋

鍾山寺避暑勉二三子

樓臺雖少景何深
滿地青苔勝布金
松影晚留僧共坐
水聲閑與客同尋
清涼會擬歸蓮社
沈湮終須棄竹林
長愛寄吟經案上
石窻秋霽向千岑

道林寺

雖向鍾峰數寺連
就中竒勝出其間
不教幽樹妨閑地
別着高窻向遠山
蓮沼水從雙澗入
客堂僧自九華還
無因得結香燈社
空向王門玷玉班

和致仕沈郎中

欲謀休退尚因循且向東溪種白蘋
謬應星辰居四輔終期冠褐作閑人
城中隔日趨朝懶楚外千峯入夢頻
殘照晚庭沉醉醒靜吟斜倚老松身

醉中詠梅花

十月清霜尚未寒雪英重疊已如搏
還悲獨詠東園裏老作南州刺史看
北客見皆驚節氣郡僚癡欲望盃盤
交親罕至長安遠一醉如泥豈自歡

閑出書懷

閑遊何用問東西寓興皆非有所期
斷酒只携僧共去看山從聽馬行遲
溪田雨漲禾生耳原野鶯啼熟時應
有交親長笑我獨輕人事鬢將衰

寺居陸處士相訪感懷却寄二三友人

湘寺閑居亦半年就中昨夜好潜然
人歸遠岫踈鐘後雪打高杉古屋前
投足正逢他國亂冥心未解祖師禪
爐煙向冷孤燈下唯有寒吟到曙天

春雪

隨風竟日勢漫漫特地繁於故歲看幽榭凍粘
花屋重短簷斜濕燕巢寒閑聽不寐詩魂爽淨
喫無厭酒肺乾莫道便爲桑麥藥亦勝焦涸到
春殘

惜花

淡淡西園日又垂一罇何忍負芳枝莫言風雨
長相促直是晴明得幾時心破只愁鶯踐落眼
穿唯怕客來遲年年使我成狂叟腸斷紅牋幾
首詩

梅花寄所親

一氣才新物未知每慙青律與先吹雪霜迷素
猶嫌早桃杏雖紅且後時雲鬢自粘飄處粉玉
鞭誰指出墻枝老夫多病無風味只向樽前詠
舊詩

登昇元閣

登高始覺太虛寬白雪須知唱和難雲渡瑣窻
金榜濕月移珠箔水精寒九天星象簾前見六
代城池直下觀唯有上層人未到金烏飛過拂
欄干

雪有作

霏霏奕奕滿寒空況是難逢值臘中未白已堪
張宴會漸繁偏好去簾櫳庭莎易集看盈地池
柳難裝旋逐風長愛清華入詩句預愁遲日放
消融

宮詞

自遠凝旒守上陽舞衣頓減舊朝香簾垂粉閣
春將盡門掩梨花日漸長草色深濃封輦路水
聲低咽轉宮墻君王一去不迴駕皓齒青娥空
斷腸

晚春送牡丹

携觴邀客遶朱欄腸斷殘春送牡丹風雨數來
留不得離披將謝忍重看氛氲蘭麝香初減零
落雲霞色漸乾借問少年能幾許不須推酒厭
盃盤

歲暮晚泊望廬山不見因懷岳僧呈察
判

貪程只爲看廬阜及到停舟恨頗濃雲暗半空
藏萬仞雪迷雙瀑在中峰林端莫辨曾遊路鳥
際微聞向暮鐘長愧昔年招我入共尋香社見

芙蓉

重臺蓮

斜倚秋風絕北倫，千英和露染難勻。自爲祥瑞生南國，誰把丹青寄北人。明月幾宵同綠水，牡丹無路出紅塵。憐伊不筭多時立，贏得馨香暗上身。

迎神

柵籬鼉吟塞笛，女巫結束分行立。空中再拜神且來，滿奠椒漿齊獻揖。陰風窸窸吹紙錢，妖巫瞑目傳神言。與君降福爲豐年，莫教賽祀虧常

筵

春詞

日高閑步下堂階，細草春莎沒繡鞋。折得玫瑰花一朵，憑君簪向鳳凰釵。

獨夜作

佳人一去無消息，夢覺香殘愁復入。空庭悄悄月如霜，獨倚欄干伴花立。

竹

瓊節高吹宿鳳枝，風流交我立志歸。最憐瑟瑟斜陽下，花影相和滿客衣。

清明日

他皆携酒尋芳去我獨關門好靜眠唯有楊花似相覓因風時復到床前

宮詞

宮門長閉舞衣閑略識君王鬢便斑却羨落花春不管御溝流得到人間

補遺

金山

不嗟白髮曾遊此不歎征帆無了期盡日憑欄誰會我只悲不見韓垂詩

延令鈔本對勘次第悉合補詩二首錄如左

乙卯十月初六日增潤記

李丞相詩集卷下

荅湯悅

司空猶不作那敢作司徒幸有山翁號如何不見呼

送李冠

勻如春澗長流水忽似秋枝欲斷蟬可惜人間容易聽清聲不到御樓前

碧雲集序

朝議郎守尚書水部郎中武騎尉賜紫金魚袋孟賓于

昔者仲尼刪三百篇梁太子選十九首厥後沿朝垂名者不少苦志者彌多入室升堂有其數矣然六義之旨二南之風後來未甚窮日沈淪者怨刺傷多取事者雅頌一貫亂後江南鄭都官王貞白用情創意不共轍不同塗俱不及矣今覩淦陽宰隴西李中字有中緣情入妙麗則可知出示全編備多奇句祇如乾坤一夕雨草木萬方春此乃王澤所均春風廣扇姑蘇懷古

云歌舞一場夢煙波千古愁因想繁華之日引
成興嘆之詞書王秀才壁句貧來賣書劍病起
憶江湖詩入興嘆時政如何聽鄭道士琴秋月
空山寂渟風一夜生乃景清虛真風迴返徐司
徒池亭句扶踈皆竹樹冷淡似瀟湘心匠所到
景致尤踈落花句酷恨西園雨生憎南陌風阻
公子懽動旅人□感寒江暮泊寄左偃云煙火
人家遠汀洲暮雨寒詩人之作客况淒然秋雨
句秋聲在梧葉潤氣逼書幃廬山句谷春攢錦
繡石潤疊瓊琳比興之言搜羅尤異江行泊句

半夜風雷過一天星斗寒恐怖一場虛明徹曉
寄劉鈞云閑花半落處幽客未來時得故人消
息句夢歸殘月曉信到落花時肺腸難述懷想
可知訪龍光謙上人云相留看山雪盡日論風
騷見請道之相於望寒山之不捨又七言宿廬
山白雲峯重道者院句雲開碧落星河近月出
滄溟世界秋又海上從事秋旦書懷句千里夢
隨殘月斷一聲蟬送蚤秋來又夜泊寄詩友魚
龍不動澄江遠煙霧皆收皎月高東林寺遠大
師句杉檜已依靈塔老煙霞空鎖影堂深登毘

陵青山樓有感句千里吳山青不斷一邊遼海
浸無窮訪洞仙宮不遇邵道者句羽客不知何
處去洞前花落立多時憶溪居句杜若菰蒲煙
雨歇一溪春色屬何人又六言句半落銅臺月
曉亂飄金谷風多客中春思云又聽黃鳥縣蠻
月斷家鄉未還春水引將客夢悠悠繞遍關山
潛泉句誰當秋霽後獨聽月明中柴司徒亭前
假山句螢影夜潛疑曉起茶煙朝出認雲歸衆
目所觀他心不到春暮懷故人句池館寂寥三
月暮落花重疊蓋莓苔惜春眷戀不忍掃感物

心情無計開贈王道士云槎流海上波濤闊酒
滿壺中天地春論玄酒大羹常徒肯愛述神龍
真虎賢者則知公負勤苦值干戈從軍之後受
命已來上表中朝乞歸故國以同氣歿世二親
在堂棄一宰於淮西獲安家於都邑公之忠孝
彰矣賢彥稱之載佩朱衣猶思丹桂乃爲言曰
且名隨榜上者衆藝逐雲高者稀今之人祇儔
方干處士賈島長江向須第一者哉公理淦民
飲淦水清白著矣歌詠興焉况今賢爲寶以禮
示人必當閨籍將書清庭即踐愚生於邂逅得

遂披承時也素月流天激江如練對滄洲而援
筆乏麗藻以當仁以公五七言兼六言二百篇
目曰碧雲集癸酉年八月五日序

碧雲集序

碧雲集目錄

登仕郎守新淦縣令知鎮事賜緋魚袋李中

卷上

春日作

寒江暮泊寄左偃

喜春雨有寄

魏夫人壇

訪邵道者不遇

寄贈沈彬郎中

贈別

送劉恭遊廬山

宿廬山重道者院

海上從事書懷

訪蔡處士留題

寄廬岳鑒上人

書小齋壁

懷王道者

桃花

思舊遊有感

送李相公赴昭武

姑蘇懷古二首

贈史虛白

贈蒯亮處士

春夕偶作

子規

書王秀才壁

春日途中作

和王去微見寄

送孫孔二秀才

春日野望懷故人

遊玄真觀

劍客

鶴

送沈郎中遊茅山

題廬山遠師影堂

庭葦

寄左偃

山店寄令圖上人

途中聞子規

春日書懷

所思代人

春晚過明氏閑居

贈重安寂道者

江邊吟

獻張義方常侍

贈永貞杜翺少府

獻中書韓舍人

獻徐舍人

新秋有感

秋雨

寄廬山白太師

訪龍光智謙上人

送遷客

柳二首

送廬阜僧歸山陽

投所知

寄左偃

遊北山洞神宮

寄重道者

雲

徐司徒池亭

賦得江邊草

江行夜泊

訪山叟留題

晚泊寄湓城知友

秋夕書情

感興

舟中望九華山

漁父

贈紫極宮劉先生

勉同志

寄劉鈞秀才

離亭前思有寄

贈上都先業大師

思九江舊居三首

贈東林白大師

春曉

聽鄭羽人彈琴

秋夕書事寄友人

秋日途中

秋夜吟寄左偃

竹

懷廬岳舊遊

依韻酬智謙上人

落花

題柳

贈謙明上人

書蔡隱士壁

贈鍾尊師遊茅山

訪徐長史留題水閣

夕陽

鷓鴣

所思

春閨辭二首

臘中作

海城秋日書懷

題柴司徒亭假山 都下寒食夜作
客中春思六言 所思六言

卷中

江館秋思 贈胸山楊宰

廬山 送孫霽書記

聽蟬寄孫明府 寄劉鈞正字

贈孫明府 贈書記張濟負外

對竹 送孫明府

經廢宅 溪邊吟

得故人消息 芳草

江南春 悼亡

春晏寄從弟德潤 贈致仕沈彬郎中

憶溪居 登下蔡縣樓

下蔡春日偶作

再遊洞神宮懷邵羽人

秋雨二首 經古觀有感

吉水春暮訪蔡處士留題

烈祖孝高挽歌二首又

贈海上觀音院文依上人

秋夕病中作 寄黃鶚秀才

春日書懷寄孫明府

柴司徒宅牡丹

贈王道者

春閨辭二首

暮春懷故人

秋日登潤州城樓

晚春客次偶吟

對雨寄胸山林明府

落花六言

燕六言

鶯六言

宿山中寺

海上載筆

春晚招魯從事

和易秀才春日見寄

送黃秀才

庭竹

送戴秀才

病起作

離家

村行

獻喬侍郎

獻中書張舍人

海上和郎戩負外

又送赴闕

書郭判官齋壁

石碁局獻時宰

海城秋夕寄舍弟

和夏侯秀才

送夏侯秀才

江南重會友人感舊二首

已未歲冬捧宣頭

哭舍弟二首

書情寄詩友

讀蜀志

獻張拾遺

獻中書湯舍人

海上太守新剏東亭

宮詞二首

采蓮女

鍾陵春思

贈夏秀才

夏日書依上人壁

下蔡春暮旅懷

捧宣頭許歸侍養

途中作

都下再會友人

登毘陵青山樓

和陳秀才見寄

春苔

夏雲

書夏秀才壁

紅華

秋吟寄陳秘書

酬王少府見貽

暮春有感

題廳前小松

貽念法華經綬上人

秋日途中

宿韋校書幽居

和友人秋夕見寄

吉水作尉酬高秀才

送智雄上人

覽友人卷

送人南遊

晉陵夏日作

夕陽

卷下

郵亭早起

客中寒食

旅館秋夕

宿米處士幽居

維舟秋浦逢故人

代別

悼懷王喪妃

酒醒懷舊夜吟

送虞道士

寄趙杞

宿臨江驛

途中柳

隔墻花

廣陵寒食夜

寄莊隱士

寄閻侍御

送張少府之江陰

寄從弟

夜泊江渚

酬華秀才見寄

貽王尊師

王昭君

送姚端歸寧

江村晚秋作

蛩

感秋書事

訪歸章禪伯

譚先生院留題

江行值風雨

杪秋夕吟懷宋維

七夕

酬閻侍御見寄

逢張秀才

送閻侍御歸闕

柴太尉席上作

海上春夕旅懷

登古寺

春日招宋維先輩

吹笛兒

所思

酬夏侯秀才見寄

喜雪

感事呈所知

送江濤

言志寄劉鈞秀才

訪澄上人

經古寺

送王道士遊東海

貽青陽宰

哭陳太師

秋江夜泊寄劉鈞

和潯陽宰五絕句

哭柴郎中

訪章禪老

泊秋浦

閑居言懷

舟次彭澤

宿鍾山知覺院

遊茅山二首

鶴

暮春吟懷寄姚端

送圖上人歸廬山

送相里秀才

漁父二首

旅次聞砧

寄楊先生六言

對酒六言

旅夜聞笛

送紹明上人

再到山陽尋故友不遇二首

寄重道者

思湓渚舊居

思胸陽春遊感舊五首

泉

題徐立教池亭

遙賦義興泉水

和毘陵曹糾見寄

貽奉長老

吉水逢蔡秀才

寄彭仁正字

和正字見寄

和柴軍使清明書事

壬申歲再過廬山 留題胡參卿幽居

放鷺鷥 柳絮

早春 春雲

送姚秀才遊毘陵 和魯裕見寄

叙吟二首 梅花

冬懷寄維真太師 獻中書潘舍人

此行在目錄後空二行

臨安府棚北睦親坊南陳宅書籍鋪印

碧雲集目錄終

碧雲集卷上

登仕郎守新淦縣令知鎮事賜緋魚袋李中

春日作

和氣來無象物情還暗新 軋坤一夕雨草木萬

方春一作水煙光媚催花鳥語頻 高臺曠望處

歌詠屬詩人

寒江暮泊寄左偃

維舟蘆荻岸離恨若為寬 煙火人家遠汀洲暮

雨寒天涯孤夢去 篷底一燈殘不是憑騷雅相

思寫亦難

仍作藻

喜春雨有寄

青春終日雨公子莫思晴任阻西園會且觀南
畝耕最憐滋隴麥不恨涇林鶯父老應相賀豐
年兆已成

魏夫人壇

仙壇遺跡在苔合落花明絳節何年返白雲終
日生旋新芳草色依舊偃松聲欲問希夷事音
塵隔上清

訪洞神宮邵道者不遇

閑來仙觀問希夷雲滿一作星壇水滿池羽客不

知何處去洞前花落立多時

雲滿一作雲隔

寄贈致仕沈彬郎中

鶴氅換朝服逍遙雲水鄉有時乘一葉載酒入

三湘塵夢年來息詩魔老亦

一作更狂尊羹與鱸膾

秋興最宜

一作長應

贈別

行盃酌罷歌聲歇不覺前汀月又生自是離人
魂易斷落花芳草本無情

送劉恭遊廬山兼寄令上人

松桂煙霞蔽梵宮詩流閑去訪支公石堂磬斷

相逢夜五老月生谿影空

宿廬山白雲峯重道者院

絕頂松堂喜暫遊一宵玄論接浮丘雲開碧落
星河近月出滄溟世界秋塵裏年光何急急夢
中強弱自悠悠他時書劍酬恩了願逐鸞車看
十洲

海上從事秋日書懷

悠悠旅宦役塵埃舊業那堪信未迴千里夢隨
殘月斷一聲蟬送蚤秋來壺傾濁酒終難醉匣
鏤青萍久不開唯有搜吟遣懷抱涼風時復上

高臺

訪蔡文慶處士留題

幽人棲息處一到滌塵心
蘚色花陰闊碁聲竹
逕深籬根眠野鹿池面戲江禽
多謝相留宿開樽拂素琴

寄廬岳鑒上人

岳寺棲餅錫常人親亦難
病披青衲重晚剃白
鬚寒烘僻茶煙暗填溝木葉乾
昔年皆禮謁頻到碧雲端

書小齋壁

其誰肯見尋冷澹少知音塵土侵閑榻煙波隔
故林竹風醒晚醉窻月伴秋吟道在唯求已明
時豈陸沉

懷王道者

閑思王道者逸格世難群何處眠青嶂從來愛
白雲酒沽應獨醉藥熟許誰分正作趨名計如
何得見君

桃花

祇應紅杏是知音灼灼偏宜閒竹陰幾樹半開
金谷曉一溪齊綻武陵深艷舒百葉特皆重子

熟千年事莫尋誰步宋墻明月下好香和影上
衣襟

思舊遊有感

長憶銜盃處醅醕尚未闌江南正煙雨樓上恰
春寒好樹藏鶯密平蕪徹野寬如今無處覓音
信隔波瀾

依韻和智謙上人送李相公赴昭武軍

暫別廟堂上雄藩去豁情秋風生鴈渚晚霧溼
龍旌吟裏過侯服夢中歸帝城下車軍庶樂千
里月華清

姑蘇懷古二首

闔閭興霸日繁盛復風流歌舞一場夢煙波千古愁樵人歸野逕魚笛起扁舟觸目牽傷感將行又駐留

蘇臺蹤跡在曠望向江濱往事誰堪問連空草自春花疑西子臉濤想伍胥神吟盡情難盡斜陽照路塵

贈史虛白

致主嘉謀尚未伸慨然深志與誰論喚迴古意琴開匣陶出真情酒滿尊明月過溪吟釣艇落

花堆席睡僧軒九重夢卜時終在莫向深雲獨閉門

贈蒯亮處士

著得新書義更幽負琴何處不遨遊玄宮寄宿月華冷羽客伴吟松韻秋滿戶煙霞思紫閣一帆風雨憶滄洲吾君側席求賢切未可懸瓢枕碧流

春夕偶作

蚤是春愁觸目生那堪春夕酒初醒貫珠聲罷人歸去半落桃花月在庭

子規

暮春滴血一聲聲
花落年年不忍聽
帶月莫啼江畔樹
酒醒遊子在離亭

書王秀才壁

茅舍何寥落
門庭長綠蕪
貧來賣書劍
病起憶江湖
對枕暮山碧
伴吟涼月孤
前賢多晚達
莫歎有霜鬚

春日途中作

干祿趨名者
迢迢別故林
春風短亭路
芳草異鄉心
雨過江山出
鶯啼村落深
未知將雅道
何

處謝知音

依韻和蠡澤王去微秀才見寄

咫尺風騷客
難諧面繼酬
相思對煙雨
一鴈下汀洲
花影誰家塢
笛聲何處樓
搯筇朗吟罷
搔首獨遲留

送孫孔二秀才遊廬山

廬山多勝景
偏稱二君遊
松逕蒼苔合
花陰碧澗流
傾壺同坐石
搜句共登樓
莫學天台客
逢山即駐留

春日野望懷故人

野外登臨望蒼蒼煙景昏暖風醫病草甘雨洗
荒村雲散天邊影潮迴島上痕故人不可見倚
杖役吟魂

遊玄真觀

閑吟遊古觀靜慮想神僊上景非難度陰功不
易全醮壇松作蓋丹井蘚成錢浩浩紅塵裏誰
來叩自然

劍客

恩讎期必報豈是輒輕生神劍冲霄去爲誰平
不平

鶴

警露精神異冲天羽翼新千年一歸日誰識令
威身

送致仕沈彬郎中遊茅山

掛却朝冠披鶴氅羽人相伴恣遨遊忽因風月
思茅嶺便挈琴樽上葉舟野寺宿時魂夢冷海
門吟處水雲秋華陽洞府年光永莫向仙鄉擬
駐留

題廬山東寺遠大師影堂

遠公遺跡在東林往事名存動苦吟杉檜已依

靈塔老煙霞空鍊影堂深入簾輕吹催香印落
石幽泉雜磬音十八賢人消息斷蓮池千載月
沉沉

庭葦

品格清於竹詩家景最幽從栽向池沼長似在
汀洲玩好招溪叟棲堪待野鷗影踈當夕照花
亂正深秋韻細堪清耳根牢好繫舟故溪高岸
上冷淡有誰遊

寄左偃

每病風騷路荒涼人莫遊惟君還似我成癖未

能休捨寐緣孤月忘形爲九秋垂名如不朽那
恨雪生頭

宿山店書懷寄東林令圖上人

一宿山前店旅情安可窮猿聲鄉夢後月影竹
窻中南楚征途闊東吳舊業空虎溪蓮社客應
笑此飄蓬

途中聞子規

春殘杜宇愁越客思悠悠雨歇孤村裏花飛遠
水頭微風聲漸咽高樹血應流因此頻回首家
山隔幾州

春日書懷

千峯雪盡鳥聲春
永日孤吟野水濱
霄漢路岐昇未得
花時空拂滿衣塵

所思代人

巫峽雲深湘水遙
更無消息夢空勞
夢迴深夜不成寐
起立閑庭花月高

春晚過明氏閑居

寥寥陋巷獨扃門
自樂清虛不厭貧
數局碁中消永日
一尊酒裏送殘春
雨催綠蘚鋪三逕
風送飛花入四隣
羨爾朗吟無外事
滄洲何必去

垂綸

贈重安寂道者

寒松肌骨鶴心情
混俗陶陶隱姓名
白髮只聞悲短景
紅塵誰解信長生
壺中日月存心近
島外煙霞入夢清
每許相親應計分
琴餘常見話蓬瀛

江邊吟

風暖汀洲吟興生
遠山如畫雨新晴
殘陽影裏水東注
芳草煙中人獨行
閃閃酒帘招醉客
深深綠樹隱啼鶯
盤桓漁舍忘歸去
雲靜高空月

又明

獻張義方常侍

雄飛看是逼崑廊逸思常聞不暫忘公署靜眠
思水石古屏閑展看瀟湘老來病酒酒病雖然減秋
杪詩魔更是狂乘興有時招羽客橫琴移月啓
茅堂

贈永貞杜翱少府

藍袍竹簡佐琴堂縣僻人稀覺日長愛靜不嫌
官况冷苦吟從聽鬢毛蒼閑尋野寺聽秋水寄
睡僧窻到夕陽騫翥會應霄漢去漁竿休更戀

滄浪

獻中書韓舍人

丹墀朝退後靜院即冥搜盡日卷簾坐前峯當
檻秋烹茶留野客展畫看滄洲見說東林夜尋
常秉燭遊

獻徐舍人

清名喧四海何止並南金與學群英伏多才萬
乘欽秩參金殿峻步歷紫薇深顧問承中旨絲
綸演帝心褒雄饒義路賈馬避詞林下直無他
事開門對遠岑軒窻來晚吹池沼歇秋霖蘚點

生碁石茶煙過竹陰希夷元已達躁競豈能侵
羽客閑陪飲詩人伴靜吟自慙爲滯物多幸辱
虛襟此日重遭遇心期出陸沉

新秋有感

門巷涼秋至高梧一葉驚漸添衾簟爽頓覺夢
魂清暗促蓮開艷乍催蟬發聲雨降炎氣減竹
引冷煙生戍客添聞思行人怯遠程未逢征鴈
下漸聽夜砧鳴張翰思鱸興班姬詠扇情音塵
兩難問蛩砌月空明

秋雨

竟日散如絲吟看半掩扉秋聲在梧葉潤氣逼
書幃曲澗泉承去危簷燕帶歸寒蛩悲旅壁亂
蘚滑漁磯爽欲除幽篔涼須換熟衣踈蓬誰夢
斷荒逕獨遊稀偏稱江湖景不妨鷗鷺飛最憐
爲瑞處南畝稻苗肥

寄廬山白大師

長憶尋師處東林寓泊時一秋同看月無夜不
論詩泉美茶香異堂深磬韻遲鹿馴眠蘚徑猿
苦叫霜枝別後音塵隔年來鬢髮衰趨名方汲
汲未果再遊期

訪龍光智謙上人

忽起尋師興穿雲不覺勞相留看山雪盡日論
風騷竹影搖禪榻茶煙上毳袍夢魂曾去否舊
國阻波濤

送遷客

危言危行是男兒倚杖相牽豈足悲莫向汀洲
時獨立悠悠斜日照江蘼

柳二首

春來無樹不青青似共東風別有情閑憶舊居
湓水畔數枝煙雨屬啼鶯

最愛青青水國中莫愁門外閒花紅纖纖無力
勝春色撼起啼鶯恨晚風

送廬阜僧歸山陽

山陽舊社終經夢容易言歸不可留瓶貯瀑泉
離五老錫搖江雨上孤舟魚行細浪分沙觜鴈
送高風下葦洲遙想枚臯宅邊寺不知涼月共
誰遊

投所知

孤琴塵翳劍慵磨自顧泥蟠欲奈何千里交親
消息斷一庭風雨夢魂多題橋未展相如志叩

足作是

柳二首首兩字

年字空一格

角誰憐甯戚歌唯賴明公
怜道在敢攜蓑笠釣
煙波

寄左偃

蕭條陋巷綠苔侵何事君心似我心
貧戶嬾開元愛靜病身纔起便思吟
閑留好鳥庭柯密暗養鳴蛩砌草深
况是清朝重文物無愁當路少知音

遊北山洞神宮

悶見塵中光景促仙鄉來禮紫陽君
人居淡寂應難老道在虛無不可聞
松檜穩棲三島鶴樓

臺閑鍊九霄雲羨師向此朝星斗
一炷清香午夜焚

思簡寂觀舊遊寄重道者

閑憶當年遊物外羽人曾許駐
仙鄉溪頭烘藥煙霞暖花下圍棋
日月長偷摘盤桃思曼倩化成蝴蝶
學蒙莊俗緣未斷歸浮世空望林泉
意欲狂

雲

悠悠離洞壑冉冉上天津
捧日終爲異從龍自有因
高行四海雨暖拂萬山春
靜與霞相近閑

將鶴最親帝鄉歸莫問楚殿夢曾頻白向封中
起碧從詩裏新冷容橫釣浦輕縷伴蟾輪不滯
濃還淡無心卷復伸非煙聊擬議千里在逡巡
會作五般色爲祥覆紫宸

徐司徒池亭

亭榭跨池塘泓澄入座涼扶踈皆竹樹冷澹似
瀟湘萍嫩鋪波面苔深鑱岸旁朝迴遊不厭僧
到賞難忘最稱收殘雨偏宜帶夕陽吟堪期謝
眺醉好命嵇康奢侈心難及清虛趣最長月明
垂釣興何必憶滄浪

賦得江邊草

岸春芳草合幾處思纏綿向暮江蘼雨初晴杜
若煙靜宜幽鷺立遠稱碧波連送別王孫處萋
萋南浦邊

江行夜泊

扁舟倦行役寂寂宿江干半夜風雷過一天星
斗寒潮平沙觜沒霜苦鴈聲殘漁父何踈逸扣
船歌未闌

訪山叟留題

策杖尋幽客相攜入竹扃野雲生晚砌病鶴立

碧雲集上
西
秋庭茶美睡心爽琴清塵慮醒輪蹄應少到門
巷草青青

江行晚泊寄湓城知友

孤舟相憶久何處倍關情野渡帆初落秋風蟬
一聲江浮殘照闊雲散亂山橫漸去湓城遠那
堪新月生

秋夕書情

功名未立誠非晚骨肉分飛又入秋枕上不堪
殘夢斷壁蛩窸月夜悠悠

感興

漁休渭水興周日龍起南陽相蜀時不遇文王
與先主經天才業擬何爲

舟中望九華山

排空蒼翠異輟櫂看崔嵬一面雨初歇九峯雲
正開當時思水石便欲上樓臺隱去心難遂吟
餘首嬾迴僧休傳紫閣屏歇寫天台中有忘機
者逍遙不可陪

漁父

煙冷暮江濱高歌散誕身移舟過蓼岸待月正
絲綸亦與樵翁約同遊酒市春白頭雲水上不

識獨醒人

贈上都紫極宮劉日新先生

道德吾君重含真本去華因知煉神骨何必在
煙霞碁散庭花落詩成海月斜瀛洲舊仙侶應
許寄丹砂

勉同志

讀書與磨劍旦夕但忘疲儻若功名立那愁變
化遲塵從侵硯席苔任滿庭除明代搜揚切升
沈莫問龜

寄劉鈞秀才

仍作沙

掩戶當春晝知君志在詩閑花半落處幽客未
來時野鳥穿沙逕江雲過竹籬會須明月夜與
子水邊期

離亭前思有寄

酒醒江亭客纏綿恨別離笙歌筵散後風月夜
長時耿耿看燈暗悠悠結夢遲若無騷雅分何
計達相思

贈上都先業大師

嬾向人前著紫衣虛堂閑倚一條藜雖承雨露
居龍闕終憶煙霞夢虎溪睡起曉窓風淅淅病

來深院草萋萋有時乘興尋師去煮茗同吟到
日西

思九江舊居三首

結茅曾在碧江隈多病貧身養拙來雨歇汀洲
垂釣去月當門巷訪僧迴靜臨窓下開琴匣悶
向牀頭潑酒醅遊宦等閑千里隔空餘魂夢到
漁臺

門前煙水似瀟湘放曠優游興味長虛閣靜眠
聽遠浪扁舟閑上泛殘陽鶴翹碧蘚庭除冷竹
引清風枕簟涼犬吠踈籬明月上隣翁攜酒到

茅堂

無機終日狎沙鷗得意高吟景且幽檻底江流
偏稱月簷前山朶最宜秋遙村處處吹橫笛曲
岸家家繫小舟別後再遊心未遂設屏唯畫白
蘋洲

贈東林白大師

六言

虎溪久駐靈蹤禪外詩魔尚濃卷箔吟消永日
移牀坐對千峯蒼苔冷鑊幽逕微風閑生古松
自說年來老病出門漸覺踈慵

春曉

殘燭猶存月尚明
幾家幃幌夢魂驚
星河漸沒行人動
歷歷林梢百舌聲

聽鄭羽人彈琴

仙鄉景已清
仙子啓琴聲
秋月空山寂
溽風一夜生
沙間蟲罷響
松頂鶴初驚
因感浮華世
誰憐太古情

秋夕書事寄友人

信斷關河遠
相思秋夜深
砌蛩聲咽咽
簷月影沉沉
未遂青雲志
那堪素髮侵
吟餘成不寐
徹曙四隣砧

秋日途中

竹林已蕭索
客思正如讎
舊業吳江外
新蟬楚驛頭
遙天踈雨過
列岫亂雲收
今夕誰家宿
孤吟月色秋

秋夜吟寄左偃

與君詩興素來狂
况入清秋夜景長
溪閣共誰看好月
莎堦應獨聽寒蟬
卷中新句誠堪喜
身外浮雲不足忙
會約垂名繼前哲
任他玄髮盡如霜

竹

森森移得自山莊
植向空庭野興長
便有好風來枕簟
更無閑夢到瀟湘
蔭來砌蘚經疎雨
引下溪禽帶夕陽
閑約羽人同賞處
安排碁局就清涼

懷廬岳舊遊寄劉鈞因感鑒上人

昔年廬岳閑遊日
乘興因尋物外僧
寄宿愛聽松葉雨
論詩唯對竹窓燈
各拘片祿尋分別
高謝浮名竟未能
一念支公安可見
影堂何處暮雲凝

依韻酬智謙上人見寄

性拙才非逸同心
友亦稀風昏秋病
眼霜溼夜吟衣鶯
谷期猶負蘭陔養
不違吾師惠佳句
勝得楚金歸

落花

年年三月暮無計
惜殘紅酷恨西園
雨生憎南陌風片
隨流水遠色逐斷
霞空悵望叢林下
悠悠飲興窮

題柳

折向離亭畔春光
滿手生羣花豈無
艷柔質自多情夾
岸籠溪月兼風撼
野鶯隋堤三月暮
飛

絮想縱橫

贈謙明上人

雖寄上都眠竹寺逸情終憶白雲端閑登鍾阜
林泉曉夢去沃洲風雨寒新試茶經煎有興舊
嬰詩病捨終難常聞秋夕多無寐月在高臺獨
凭闌

書蔡隱士壁

病後霜髭出衡門寂寞中蠹侵書帙損塵覆酒
罇空池暗菰蒲雨逕香蘭蕙風幽閑已得趣不
見卜窮通

贈鍾尊師遊茅山

筇杖擔琴背俗塵路尋茅嶺有誰群仙翁物外
應相遇靈藥壺中必許分香入肌膚花洞酒冷
侵魂夢石林雲伊予亦有朝修志異日遨遊願
見君

訪徐長史留題水閣

君家池閣靜一到且淹留坐聽蒹葭雨如看鳥
嶼秋盃盤深有興吟笑迴忘憂更愛幽竒處雙
雙下野鷗

夕陽

影未沉山水面紅遙天雨過促征鴻魂銷舉子
不回首閑照槐花驛路中

鷓鴣

流品是鴛鴦翻飛雲水鄉風高離極浦煙暝入
方塘比鷺行藏別穿荷羽翼香雙雙浴輕浪誰
見在瀟湘

所思

此首末句缺四字
已下又缺八首

離思春來切誰能慰寂寥花飛寒食過雲重楚
山遙耿耿夢徒往悠悠鬢易凋那堪對明月獨

碧雲集卷上

題上仍有巨

主四字缺

碧雲集卷中

江館秋思因感自勉

江邊候館幽汀島暝煙收客思雖悲月詩魔又
愛秋聲名都是幻窮達未能憂散逸憐漁父波
中漾小舟

贈胸山楊宰

訟閑徵賦畢吏散卷簾時聽雨入秋竹留僧覆
舊碁得詩書落葉煮茗汲寒池化俗功成後煙
霄會有期

廬山

碁作碁

控歷潯陽境崔嵬古及今勢雄超地表翠盛接
 天心湓浦春煙列星灣晚影沈圖經宜細覽題
 詠卒難任靖節門遥對庾公樓俯臨參差含積
 雪隱映見歸禽峭拔推雙劍清虛數二林白蓮
 池宛在翠輦事難尋天近星河冷龍歸洞穴深
 谷春攢錦繡石潤疊瓊琳玄鶴傳仙拜青猿伴
 客吟泉通九江遠雲出幾州陰冬有靈湯溢夏
 無炎暑侵他年如遂隱五老是知音

送孫霽書記赴壽陽辟命

辟命羨君赴其如愴別情酒闌汀樹晚帆展野

風生淮靜寒煙斂村遥夜火明醉沈胸嶺夢吟
 達壽春城舊友搖鞭接元戎掃塌迎雪晴蓮幕
 啓雲散桂山橫王粲從軍畫陳琳草檄名知君
 提健筆重振此嘉聲

聽蟬寄胸山孫明府

忽聽新蟬發客情其奈何西風起槐柳故國阻
 煙波隴笛悲猶少巴猿恨未多不知陶靖節還
 動此心麼

秋江夜泊寄劉鈞正字

閑憶詩人思倍勞維舟清夜泥風騷魚龍不動

澄江遠煙霧皆收皎月高潮滿釣舟迷浦嶼霜
繁野樹叫猿猱此時吟苦君知否雙鬢從他有
二毛

贈胸山孫明府

縣庭無事似山齋滿砌青青旋長苔閑撫素琴
曹吏散自烹新茗海僧來買將病鶴勞心養移
得閑花用意栽幾度話一作訪君留我醉甕香皆值
酒新開

贈海上書記張濟負外

鵬霄休歎志難伸貧病雖縈道且存阮瑀不能

專筆硯嵇康惟要樂琴樽春風滿院空欹枕芳
草侵堦獨閉門劍有塵埃書有蠹昔年心事共
誰論

對竹

嬾穿幽徑衝鳴鳥愁踏清陰損翠苔不似閉門
欹枕聽秋聲如雨入軒來

送胸山孫明府赴壽陽幕府辟命

堪羨元戎虛右席便承綸綍赴金臺菊叢顛顛
陶潛去蓮幕光輝阮瑀來好向樽罍陳妙畫定
應書檄播雄才預愁別後相思處月入閑窓遠

夢回

經廢宅

一夢奢華去不還
斷墻花發豈堪看
玉纖素縷
知何處金井梧枯碧甃寒

溪邊吟

鷓鴣雙飛下碧流
蓼花蘋穗正含秋
茜裙二八
采蓮去笑衝微雨上蘭舟

得故人消息

多難分離久相思
每淚垂夢歸殘月曉
信到落花時
未必乖良會何當有後期
那堪樓上望煙

水接天涯

芳草

二月正綿綿
離情被爾牽
四郊初過雨
萬里正鋪煙
眷戀殘花惹留連
醉客眠飄香是杜若
最憶楚江邊

江南春

千家事勝遊
景物可忘憂
水國樓臺晚
春郊煙雨收
鷓鴣啼竹樹
杜若媚汀洲
永巷歌聲遠
王孫會莫愁

悼亡

巷深芳草細門靜綠楊低室邇人何處花殘月
又西武陵期已負巫峽夢終迷獨立銷魂久雙
雙好鳥啼

春晏寄從弟德潤

相思禁煙近樓上動吟魂水國春寒在人家暮
雨昏朱橋通竹樹香徑匝蘭蓀安得吾宗會高
歌醉一樽

仍作尊

贈致仕沈彬郎中

自言婚嫁畢塵事不關心老去詩魔在春來酒
病深山翁期采藥海月伴鳴琴多謝維舟處相

留接靜吟

憶溪居

竹軒臨水靜無塵別後鳧鷖入夢頻杜若菰蒲
煙雨歇一溪春色屬何人

登下蔡縣樓

長涯煙水又含秋吏散時時獨上樓信斷蘭臺
鄉國遠依稀王粲在荊州

下蔡春日偶作

旅館飄飄類斷蓬悠悠心緒有誰同一宵風雨
花飛後萬里鄉關夢自通多難不堪容鬢改沃

愁惟泊酒杯空采蘭扇枕何時遂洗慮焚香叩
上穹

再遊洞神宮懷邵羽人有感

重向煙蘿省舊遊因尋遺跡想浮丘松頭鶴去
三清遠壇畔月明千古秋泉落小池清復咽雲
從高嶠起還收自慙未得冲虛術白髮無情漸
滿頭

秋雨二首

飄灑當窮巷苔深落葉鋪送寒來客館滴夢在
庭梧逼砌蛩聲斷侵窓燭影孤遙思漁叟興蓑

題名有二首四字

笠在江湖

竟日聲蕭颯兼風不暫闌竹窓秋睡美荻浦夜
漁寒地僻苔生易林疎鳥宿難誰知苦吟者坐
聽一燈殘

經古觀有感

古觀寥寥枕碧溪偶思前事立殘暉漆園化蝶
名空在柱史猶龍去不歸丹井泉枯苔鎖合醮
壇松老鶴來稀回頭因歎浮生事夢裏光陰疾
若飛

吉水春暮訪蔡文慶處士留題

題作開

無事無憂鬢任蒼濁醪閑酌送韶光溟濛雨過
池塘暖狼籍花飛硯席香好古未嘗踈典冊懸
圖時要看瀟湘戀君清話難留處歸路迢迢又
夕陽

烈祖孝高挽歌二首

誰解叩軋關音容去不還位方尊北極壽忽殞
南山鳳輦應難問龍髯不可攀千秋遺恨處雲

物鎖橋山

僊馭歸何處蒼蒼問且難華
喧道德陵壠葬

衣冠御水穿城咽宮花泣露寒九疑消息斷空

望白雲端

贈海上觀音院文依上人

煙霞海邊寺高卧出門慵白日少來客清風生
古松虛窻從蔓入壞屐任苔封幾度陪師話相
留到暮鍾

秋夕病中作

卧病當秋夕悠悠枕上情不堪拋月色無計避
蟲聲煎藥唯憂澁停燈又怕明曉臨清鑑裏應
有白鬢生

寄黃鸚秀才

長憶狂遊日惜春心恰同預愁花片落不遣酒
壺空草軟眠難捨鶯嬌聽莫窮如今千里隔搔
首對秋風

春日書懷寄胸山孫明府

一作邊城客閉門兩度春鶯花深院雨書劍滿
床塵紫閣期終負青雲道未伸猶憐陶靖節詩
酒每相親

柴司徒宅牡丹

暮春欄檻有佳期公子開顏乍折時翠幄密籠
鶯未識好香難掩蝶先知願陪妓女爭調樂欲

賞賓朋預課詩只恐却隨雲雨去隔年還是動
相思

贈王道者

混俗從教鬢似銀世人無分得相親槎流海上
波濤闊酒滿壺中天地春功就不看丹竈火性
閑時拂玉琴塵仙家變化誰能測只恐洪崖是
此身

春閨辭二首

塵昏菱鏡懶修容雙臉桃花落盡紅玉塞夢歸
殘燭在曉鶯窗外轉梧桐

邊無音信暗消魂
茜袖香裙積淚痕
海燕歸來門半掩
悠悠花落又黃昏

暮春懷故人

池館寂寥三月盡
落花重疊蓋莓苔
惜春眷戀不忍埽
感物心情無計開
夢斷美人沈信息
目穿長路倚樓臺
琅玕繡段安可得
流水浮雲共不回

秋日登潤州城樓

虛樓一望極封疆
積雨晴來野景長
水接海門鋪遠色
稻連京口發秋香
鳴蟬歷歷空相續
歸

鳥翩翩自著行吟罷
倚闌深有思
清風留我到斜陽

晚春客次偶吟

暫駐征輪野店間
悠悠時節又春殘
落花風急宿醒解
芳草雨昏春夢寒
暫逐利名頭易白
欲眠雲水志猶難
却憐村寺僧相引
閑上虛樓共倚闌

對雨寄胸山林番明府

竟日如絲不暫停
莎堦閑聽滴秋聲
斜飄虛閣琴書潤
冷逼幽窗夢寐清
開戶只添搜句味
看

山還阻上樓情遙知公退琴堂靜坐對蕭騷飲
興生

落花六言

殘紅引動詩魔懷古牽情奈何半落銅臺月曉
亂飄金谷風多悠悠旋逐流水片片輕黏短莎
誰見長門深鎖黃昏細雨相和

燕六言

豪家五色泥香銜得營巢太忙喧覺佳人晝夢
雙雙猶在雕梁

鶯六言

羽毛特異諸禽出谷堪聽好音薄暮欲棲何處
雨昏楊柳深深

宿山中寺

寄宿深山寺惟逢老病僧風吹幾世樹雲暗暮
秋燈瞑目忘塵慮談空入上乘明晨返名路何
計戀南能

海上載筆依韻酬左偃見寄

都城分別後海嶠夢魂迷吟興踈煙月邊情起
鼓鼙戍旗風颭小營柳霧籠低草檄無餘刃難
將阮瑀齊

春晚招魯從事

袞袞利名役應嗟聚會稀有
心遊好景無術駐
殘暉南陌草爭茂西園花亂飛
期君舉盃酒不醉莫言歸

和易秀才春日見寄

每恨多流落吾徒不易親
相逢千里客共醉百花春
小檻山當面閑堦柳拂塵
何時卜西上月桂枝新

送黃秀才

雨餘飛絮亂相別思難任
酒罷河橋晚帆開煙

水深蟾宮須展志漁艇莫率心
岐路從茲遠雙魚信勿沈

庭竹

偶自山僧院移歸傍砌栽
好風終日起幽鳥有時來
篩月牽詩興籠煙伴酒盃
南窓睡輕起蕭颯雨聲回

送戴秀才

已是殊鄉客送君重慘然
河橋乍分手首槐柳正鳴蟬
短櫂離幽浦孤帆觸遠煙
聖朝重文物變化莫遷延

病起作

閑齋病初起心緒復悠悠開篋群書蠹聽蟬滿
樹秋詩魔還漸動藥債未能酬爲憶前山色扶
持上小樓

離家

送別人歸春日斜獨鞭羸馬指天涯月生江上
鄉心動投宿忙近酒家

村行

極目青青隴麥齊野塘波闊下鳧鷖陽烏景暖
林桑密獨立閑聽戴勝啼

獻喬侍郎

位望誰能並當年志已伸人間傳鳳藻天上演
龍綸賈馬才無敵褒雄譽益臻除姦深繫念致
主迴忘身諫疏縱橫上危言果敢陳忠貞雖冠
世消長豈由人慷慨辭朝闕迢迢涉路塵千山
明夕照孤櫂渡長津杜宇聲方切江蘼色正新
卷舒惟合道喜愠不勞神禪客陪清論漁翁作
近隣靜吟窮野景狂醉養天真格論思名士輿
情渴直臣九霄恩復降比戶意皆忻却入鴛鴦
序終承顧問頻漏殘丹禁曉日暖玉墀春鑒物

心如水憂時鬢若銀惟期康庶事永要叙彝倫
貴賤知無間孤寒必許親幾多沈滯者拭目望
陶鈞

獻中書張舍人

仙桂從攀後人間播大名飛騰諧素志霄漢是
前程持憲威聲振司言品秩清簾開春酒醒月
上草麻成丹陛凌晨對青雲青逐步生照人裴玉
瑩鑿物憲波明下直無他事閑遊恣逸情林僧
開戶接溪叟埽苔迎煮茗山房冷垂綸野艇輕
神清宜放曠詩苦益縱橫餘刃時皆仰嘉謀衆

仍作畢貧

佇行四方觀啓沃畢竟念孤貧

海上和郎戩負外赴倅職

宋玉逢秋何起悲新恩委寄好開眉班昇鴛鷺
頻經歲任佐龔黃必暫時乍對煙霞吟海嶠應
思蘋蓼夢江湄一朝鳳詔重徵入鵬化那教藩
鷄知

又送赴闕

心似白雲歸帝鄉暫停良畫別龔黃煙波乍曉
浮蘭棹魂夢先飛近御香一路伴吟河草綠幾
程清思水風涼想應敷對忠言後不放卿雲離

太陽

書郭判官幽齋壁

不妨公退尚清虛
初得幽齋興有餘
要引好風清戶牖
旋栽新竹滿庭除
傾壺待客花開後
煮茗留僧月上初
更有野情堪愛處
石牀苔蘚似匡廬

石碁局獻時宰

得從岳叟誠堪重
却獻臯夔事更宜
公退啓枰書院靜
日斜收子竹陰移
適情豈待樵柯爛
罷局還應屐齒墮
預想幽窻風雨夜
一燈閑照覆

碁作碁

圖時

海城秋夕寄懷舍弟

鳥棲庭樹夜悠悠
枕上誰知淚暗流
千里夢魂迷舊業
一城砧杵擣殘秋
窻間寂寂燈猶在
簾外蕭蕭雨未休
早晚萊衣同著去
免悲流落在邊州

和夏侯秀才春日見寄

綿蠻黃鳥不堪聽
觸目離愁怕酒醒
雲散碧山當晚檻
雨催青蘚匝春庭
尋芳嬾向桃花塢
垂釣空思杜若汀
晝夢不成因吟一作有興揮毫書在

枕邊屏

送夏侯秀才

江村搖落暮蟬鳴
執手臨岐動別情
古岸相看殘照在
片帆難駐好風生
牽吟一路逢山色
醒睡長汀對月明
况是清朝至公在
預知喬木定遷鶯

江南重會友人感舊二首

江南重會面
聊話十年心
共立黃花畔
空驚素髮侵
斜陽浮遠水
歸鳥下疎林
牽動詩魔處
涼風村落砧

仍有二首形字

景物作物景

長江落照天
景物似當年
憶昔携村酒
相將上釣船
狂歌紅蓼岸
驚起白鷗眠
今日趨名急
臨風一黯然

已未歲冬捧宣頭離下蔡

詔下如春煦
巢南志不違
空將感恩淚
盡滴冒寒衣
覆載無容善
形骸果得歸
無心慙季路
負米覲親闈

哭舍弟二首

鴻鴈離群後
成行憶日存
誰知歸故里
只得奠吟魂
蟲蠹書盈篋
人稀草擁門
從茲長慟後
獨

自奉晨昏

浮生多天枉惟爾最堪悲同氣未歸日慈親臨

老時舊詩傳海嶠

舍弟有詩云夢斷海山遠
夜長風雨多傳至海上

新塚枕江湄

遺稚嗚嗚處黃昏繞總帷

書情寄詩友

默默誰知我徘徊野水邊詩情長若舊吾事更
無先芳草人稀地殘陽鴈過天靜思吟友外此
意復誰憐

讀蜀志

鼎分天地日先主力元微魚水從相得山河遂

有歸仁賢無間忌報國盡神機草昧爭雄者君
臣似此稀

獻張拾遺

官資清貴近丹墀性格孤高世所稀金殿日開
親鳳宸古屏時展看漁磯酒醒虛閣秋簾捲吟
對踈篁夕鳥歸獻替頻陳忠譽播鵬霄萬里展
雄飛

獻中書湯舍人

慶雲呈瑞爲明時演暢絲綸在紫微鑿殿對時
親舜日鯉庭過處著萊衣閑尋竹寺聽啼鳥吟

倚江樓戀落暉隔座銀屏若是設一門清貴古今稀

海上太守新荆東亭

使君心智杳難同選勝開亭景莫窮高敞軒窓迎海月預栽花木待春風靜披典籍堪師古醉擁笙歌不礙公滿徑苔紋踈雨後入簷山色夕陽中偏宜下榻留徐孺最稱登門禮孔融事簡豈妨頻賞翫况當爲政有餘功

宮詞二首

門鎖簾垂月影斜翠華咫尺隔天涯香銷羅幌

不成夢背壁銀缸落盡花
金波寒透水晶簾燒盡沈檀手自添風遞笙歌門又掩翠華何處夜厭厭

采蓮女

晚涼含笑上蘭舟波底紅粧影欲浮陌上少年休植足荷香深處不回頭

鍾陵春思

沈沈樓影月當午冉冉風香花正開芳草迢迢滿南陌王孫何處不歸來

贈夏秀才

軒車紫陌競尋春，獨掩衡門病起身。步月怕傷
三逕蘚，取琴因拂一牀塵。明時儻有丹枝分，清
鑑從他素髮新。况是青雲知己在，原思生計莫
憂貧。

夏日書依上人壁

門外塵飛暑氣濃，院中蕭索似山中。最憐煮茗
相留處，踈竹當軒一榻風。

下蔡春暮旅懷

柳過清明絮亂飛，旅中懷抱獨悽悽。月生淮上
雲初散，家在江南夢去迷。髮白每慙青鑑啓，心

仍作青
作栖

孤長怯子規啼，拜章為養慈親急。願向明朝捧
紫泥。

捧宣頭許歸侍養

泥書捧處聖恩新，許覲庭闈養二親。螻蟻至微
寧足數，未知何處荅穹旻。

途中作

逢舊識聞老親
所患不至如甚

煙波涉歷指家林，欲到家林懼却深。得信慈親
疴瘵減，當時寬勉采蘭心。

都下再會友人

誰言多難後，重會喜淹留。欲話關河夢，先驚鬢

采作採

髮秋浮雲空冉冉遠水自悠悠多謝開青眼携
壺共上樓

登毗陵青山樓

高樓閑上對晴空豁目開襟半日中千里吳山
青不斷一邊遼海浸無窮人生歌笑開花露世
界興亡落葉風吟罷倚闌何限意回頭城郭暮
煙籠

晉陵罷任寓居依韻和陳銳秀才見寄
掩門三逕莓苔絕車馬誰來陋巷間卧棄琴書
公幹病笑迎風月步兵閑當秋每謝蛩清耳漸

老多慙酒借顏濟物未能伸一術敢於明代愛

青山

春苔

春霖催得鎖煙濃竹院莎齊逕小通誰愛落花
風味處莫愁門巷襯殘紅

夏雲

如峯影狀在西郊未見從龍上次寥多謝好風
吹起後化爲甘雨濟田苗

書夏秀才幽居壁

永巷苔深戶半開牀頭書劍積塵埃最憐小檻

疎篁晚幽鳥雙雙何處來

紅花

紅花顏色掩干花任是猩猩血未加染出輕羅
莫相貴古人崇儉誠奢華

安福縣秋吟寄陳銳秘書

縣庭事簡得餘功詩興秋來不可窮卧聽寒螿
莎砌月行衝落葉水村風愁鬢漸去人前白醉
酒猶憐鑑裏紅苦恨交親多契闊未知良會幾
時同

新喻縣酬王仲華少府見貽

尊作樽

事簡開尊有逸情共忻官舍月華清每慙花欠
河陽景長愧琴無單父聲未泰黎元誠曠職縱
行謙直是虛名與君盡力行公道敢向昌朝俟
陟明

暮春有感寄宋維貞外

維作維

杜宇聲中老病心此心無計駐光陰西園雨過
好花盡南陌人稀芳草深喧夢却嫌鶯語老伴
吟惟怕月輪沈明年纔候東風至結駟期君預
去尋

題吉水縣廳前新栽小松

剝開幽澗蘚苔斑移得孤根植砌前影小未遮
官舍月翠濃猶帶舊山煙群花解笑香寧久衆
木雖高節不堅輸我婆娑欄檻內晚風蕭颯學
幽泉

貽念法華經綬上人

五更初起埽松堂瞑目先焚一炷香念徹蓮經
誰得見千峯巖外曉蒼蒼

秋日途中

信步騰騰野岸邊離家都爲利名牽踈林一路
斜陽裏颯颯西風滿耳蟬

宿韋校書幽居

溪上高眠與鶴閑開尊留我待柴關園林月白
秋霖歇一夜泉聲似故山

依韻和友人秋夕見寄

夕風庭葉落誰見此時情不作關河夢空聞砧
杵聲會須求至理何必歎無成好約高僧宿同
看海月生

吉水作尉酬高援秀才見贈

佐邑慙無術敢言貪與清風騷誰是主煙月自
關情卷箔當山色開窓就竹聲憐君惠佳句資

我欲垂名

送智雄上人

忽起遊方念飄然不可留
未知携一錫乘興向何州
古岸春雲散遙天晚雨收
想應重會面風月又清秋

覽友人卷

新詩開卷處造化竭精英
雪霽楚山碧月高湘水清
初吟塵慮息再詠古風生
自此寰區內喧騰二雅名

送人南遊

浪跡天涯去南荒必動情
草青虞帝廟雲暗夜郎城
越鳥驚鄉夢蠻風解宿醒
早思歸故里華髮等閑生

晉陵縣夏日作

事簡公庭靜開簾暑氣中
依經煎綠茗入竹就清風
至論招禪客忘機憶釣翁
晚涼安枕簟海月出墻東

夕陽

影未沉山水面紅遙天雨過促
征鴻魂銷舉子不回首
閑照槐花驛路中碧雲集卷中

此首已見卷上
六首出

出學東

昔風至誠亦解客志無難
昔前公或轉開翰卷中
音刻線夏日非

碧雲集卷下

郵亭蚤起

郵舍殘燈在村林雞唱頻
星河吟裏曉川陸望
中春舊友青雲貴殊鄉
素髮新悠悠念行計難
更駐征輪

客中寒食

旅次經寒食思鄉淚濕巾
音書天外斷桃李雨
中春欲飲都無緒唯吟
似有因輸他郊郭外多
少踏青人

旅館秋夕

寥寥山館裏，獨坐酒初醒。舊業多年別，秋霖一夜聽。砌蟲聲漸息，窗燭影猶停。早晚無他事，休如泛水萍。

宿青溪米處士幽居

寄宿溪光裏，夜涼高士家。養風窻外竹，叫月水中蛙。靜慮同搜句，清神旋煮茶。唯憂曉雞唱，塵裏事如麻。

維舟秋浦逢故人張矩同泊

卸帆清夜碧江濱，冉冉涼風動白蘋。波上正吟新霽月，岸頭恰見故鄉人。共驚別後霜侵鬢，互

說年來疾逼身。且飲一壺銷百恨，會須遭遇識通津。

代別

明日鳴鞭天一涯，悠悠此夕却分離。紅樓有恨金波轉，翠黛無言玉筯垂。浮蟻不能迷遠意，回紋從此寄相思。花時定是慵開鑑，獨對春風忍掃眉。

悼懷王喪妃

花綻花開事可驚，暫來浮世返蓬瀛。楚宮夢斷雲空在，洛浦神歸月自明。香解返魂成浪語，膠

對作向

能續斷是虛名音容寂寞春何處誰會樓中獨立情

酒醒

睡覺花陰芳草軟不知明月出墻東盃盤狼籍人何處聚散空驚似夢中

送虞道士

煙霞聚散通三島星斗分明在一壺笑說餘杭沽酒去蔡家重要會麻姑

懷舊夜吟寄趙杞

長笛聲中海月飛桃花零落滿庭墀魂銷事去

無尋處酒醒孤吟不寐時萱草豈能忘積恨尺書誰與達相思悠悠方寸何因解明日江樓望渺瀰

宿臨江驛

候館寥寥輟棹過酒醒無奈旅愁何雨昏郊野行人少葦暗汀洲宿鴈多干祿已悲凋髮鬢結茅終媿負煙蘿篇章早晚逢知己苦志忘形自有魔

途中柳

翠色晴來近長亭路去遙無人折煙縷落日拂

溪橋

隔牆花

顏色尤難近馨香不易通朱門金鎖隔空使怨
春風

廣陵寒食夜

廣陵寒食夜豪貴足佳期紫陌人歸後紅樓月
上時綺羅香未歇絲竹韻猶遲明日踏青興輸
他輕薄兒

寄廬山莊隱士

煙蘿擁竹關物外自求安逼枕溪聲近當簷岳

色寒藥苗應自采琴調對誰彈待了浮名後依
君共掛冠

吉水寄閻侍御

時公調
官瀑川

何處懷君切令人欲白頭偶尋花外寺獨立水
邊樓不得論休戚何因校獻酬吟餘興難盡風
笛起漁舟

送張惟貞少府之江陰

相送煙汀畔酒闌登小舟離京梅雨歇到邑早
蟬秋俗必期康濟詩誰互唱酬晚涼諸吏散海
月入一作虛樓

鍾陵禁煙寄從弟

落絮飛花日又西
踏青無侶草萋萋
交親書斷竟不到
忍聽黃昏杜宇啼

夜泊江渚

水鄉明月上晴空
汀島香生杜若風
不是當年獨醒客
且沽村酒待漁翁

吉水縣依韻酬華松秀才見寄

官況蕭條在水村
吏歸無事好論文
枕欹獨聽殘春雨
夢去空尋五老雲
竹逕每憐和蘚步
禽聲偏愛隔花聞
詩情冷淡知音少
獨喜江臯得

偏作便

見君

貽廬山清溪觀王尊師

霞帔星冠復杖藜
積年脩煉住靈溪
松軒睡覺冷雲起
石磴坐來春日西
采藥每尋巖徑遠
彈琴常到月輪低
鼎中龍虎功成後
海上三山去不迷

王昭君

蛾眉翻自累萬里
陷窮邊滴淚
風起寬心漢
月圓飛塵長翳日
白草自連天
誰貢和親策
千秋污簡編

送姚端先輩歸寧

知君歸覲省稱意涉通津解纜汀洲曉張帆煙
水春牽吟芳草遠貫酒亂花新拜慶庭闈處蟾
枝香滿身

江村晚秋作

高秋水村路隔岸見人家好是經霜葉紅於帶
露花臨罾魚易得就店酒難賒吟興胡能盡風
清日又斜

蛩

月冷莎庭夜已深百蟲聲外有清音詩情正苦

無眠處愧爾堦前相伴吟

感秋書事

官途_官憔悴雪生頭家計相牽未得休紅蓼白蘋
消息斷舊溪煙月負漁舟

訪廬山歸章禪伯

沈沈石室踈鍾後寂寂莎池片月明多少學徒
求妙法要於言下悟無生

廬山棲隱洞譚先生院留題

壇畔歸雲冷溼襟拂苔移石坐花陰偶然醒得
莊周夢始覺玄門興未深

江行值暴風雨

風狂雨暗舟行懼自委神明志不邪投得葦灣
波浪息岸頭煙火近人家

杪秋夕吟懷寄宋維先輩

江島窮秋木葉稀月高何處擣寒衣苦嗟不見
登龍客此夜悠悠一夢飛

七夕

星河耿耿正新秋絲竹千家列綵樓可惜穿針
方有興纖纖初月苦難留

吉水作尉時酬閣侍御見寄

謬佐驅雞任常思賦鵬人時閣公謫官吉州未諧林下約空
感病來身鎖逕青苔老鋪堦紅葉新相思不可
見猶喜得書頻

清溪逢張惟貞秀才

洞隱紅霞外房開碧嶂根昔年同鍊句幾夜共
聽猿考古書千卷忘憂酒一罇如今歸建業雅
道喜重論

送閣侍御歸闕

羨君乘紫詔歸路指通津鼓棹煙波暖還京雨
露新趨朝丹禁曉聳轡九衢春自媿湮沈者隨

軒未有因

甲子歲罷吉水縣過鍾陵時暮春維舟

江渚謁柴太尉席上作

公侯延駐暫踟躕。況值風光三月初。
亂落盃盤花片小。靜籠池閣柳陰疎。
舟維南浦程難阻。飲預西園興有餘。
却笑田家門下客。當時容易歎車魚。

海上春夕旅懷寄左偃

柳過清明絮亂飛。感時懷舊思淒淒。
月生樓閣雲初散。家在汀洲夢去迷。
髮白每慙清鑑啓。酒

醒長怯子規啼。北山高卧風騷客。安得同吟復

杖藜

此詩與中卷下蔡春暮旅懷
惟三四句稍異末二句不同耳

江次維舟登古寺

輟棹因過古梵宮。荒涼門逕鎖苔茸。
綠陰滿地前朝樹。清韻含風後殿鍾。
童子縱慵眠壞榻。老僧耽話指諸峯。
吟餘却返來時路。回首盤桓尚駐筇。

春日招宋維先輩

甕中竹葉今朝熟。鑑裏桃花昨夜開。
爲報廣寒攀桂客。莫辭相訪共銜杯。

吹笛兒

隴頭休聽月明中
妙竹嘉音際會逢
見爾樽前吹一曲
令人重憶許雲封

雲封開元中善笛者

所思

解珮當時在洛濱
悠悠疑是夢中身
自從物外無消息
花謝鶯啼近十春

吉水縣酬夏侯秀才見寄

啓鑑悠悠兩鬢蒼
病來心緒易淒涼
知音不到吟還懶
鎖印開簾又夕陽

和友人喜雪

仍在樽

臘雪頻頻降成堆
不可除伴吟花莫並銷瘴藥
何如謝女詩成處
袁安睡起初深迷樵子逕
冷逼旅人居惹砌
催樽俎飄窓溼簿書
最宜樓上望散亂滿空虛

感事呈所知

競愛松筠翠皆憐桃李芳
如求濟世廣桑柘願商量

送江濤

知君別家後不免淚霑襟
芳草千里路夕陽孤客心
花飛當野渡猿叫在煙岑
霄漢知音在何

須恨陸沈

言志寄劉鈞秀才

童稚親儒墨時平喜道存酬身指書劍賦命委
軋坤秋爽鼓琴興月清搜句魂與君同此志終
待至公論

訪澂上人

尋師來靜境神骨覺清涼一餉逢秋雨相留坐
竹堂石渠堆敗葉莎砌咽寒蟬話到南能旨怡
然萬慮忘

經古寺

殿宇半隳摧門臨野水開雲凝何代樹草蔽此
時臺遠塔堆黃葉沿階積綠苔踟躕日將暮棲
鳥入巢來

送王道士遊東海

巨浸常牽夢雲遊豈覺勞遙空收晚雨虛閣看
秋濤必若思三島應須釣六鼇如通十洲去誰
信碧天高

貽青陽宰

徵賦常登限名山管最多吏閑民訟少時得訪
煙蘿

仍作尊

哭故主人陳太師

十年孤跡寄侯門入室升堂忝厚恩
遊徧春郊隨茜旆飲殘秋月待金尊
車魚鄭重知難報吐握周旋不可論
長慟徘徊逝川上白楊蕭颯又黃昏

秋江夜泊寄劉鈞

萬里江山斂暮煙旅情當此獨悠然
沙汀月冷帆初卸葦岸風多人未眠
已聽漁翁歌別浦更堪邊鴈過遙天
與君共俟酬身了結侶波中寄釣船

和潯陽宰感舊絕句五首

追感古今情不已竹窓閑取史書看
欲親往哲無因見空樹臨風襟袖寒

潯陽物景真難及四瀉澄江最好看
曾上虛樓吟倚檻五峯擎雪照人寒

園林春媚千花發爛熳如將畫障看
惟愛松筠多冷淡青青偏稱雪霜寒

知君百里鳴琴處公退千山盡日看
政化有同風偃草更將餘力拯孤寒

昔歲尋芳欣得侶江堤物景盡情看
就中吟戀

五首二字旁注

垂楊下撼起啼鶯晚吹寒

哭柴郎中

昔歲遭逢在海城曾容孤跡奉雙旌酒邊不厭
笙歌盛花下只愁風雨生碁接山亭松影晚吟
陪月檻露華清音塵自此無因問淚灑川波夕
照明

訪章禪老

比尋禪客叩禪機澄却心如月在池松下偶然
醒一夢却成無語問吾師

泊秋浦

葦岸風高宿鴈驚維舟特地起鄉情漁兒隔水
吹橫笛半夜空江月正明

閑居言懷

未達難隨衆從他俗所憎閑聽九秋雨遠憶四
明僧病後倦吟嘯貧來踈友朋寂寥元合道未
必是無能

舟次彭澤

飄泛經彭澤扁舟思莫窮無人秋浪晚一岸蓼
花風鄉里夢漸遠交親書未通今宵見圓月難
坐冷光中

宿鍾山知覺院

宿投林下寺中夜覺神清磬罷僧初定山空月
又生籠燈吐冷艷巖樹起寒聲待曉紅塵裏依
然冒遠程

遊茅山二首

綠蘚深迎步紅霞爛滿衣洞天應不遠鸞鶴向
人飛
茅許仙踪在煙霞一境清希夷何許叩松逕月
空明

鶴

九臯羽翼下晴空萬里心難駐玉籠清露滴時
翹蘚逕白雲開處唳松風歸當華表千年後怨
在瑤琴別操中好共靈龜作儔侶十洲三島逐
仙翁

暮春吟懷寄姚端先輩

無奈詩魔旦夕生更堪芳草滿長汀故人還爽
花前約新月又生江上亭莊夢斷時燈欲燼蜀
魂啼處酒初醒何時得見登龍客隔却千山萬
仞青

送圖上人歸廬山

蓮宮舊隱塵埃外策杖臨風拂袖還踏雪獨尋
青嶂下聽猿重入白雲間蕭騷紅樹當門老斑
駁蒼苔鎖逕閑預想松軒夜禪處虎溪圓月照
空山

送相里秀才之匡山國子監

氣秀情閑杳莫群廬山遠去志求文已能探虎
窮騷雅又欲囊螢就典墳目豁乍窺千里浪夢
寒初宿五峯雲業成早赴春闈約要使嘉名海
內聞

漁父二首

偶向蘆花深處行溪光山色晚來晴漁家開戶
相迎接稚子爭窺犬吠聲
雪鬢衰髯白布袍笑携頰鯉換村醪殷勤留我
宿溪上釣艇歸來明月高

旅次聞砧

砧杵誰家夜擣衣金風浙浙露微微月中獨坐
不成寐舊業經年未得歸

寄楊先生六言

仙翁別後無信應共煙霞卜隣莫把壺中祕訣
輕傳塵裏遊人浮生日月自急上境鶯花正春

六言二字旁注
都作却

安得一招琴酒與君共泛天津

對酒招陳昭用六言

花開葉落堪悲似水年光暗移身世都如夢役
是非空使神疲良圖有分終在所欲無勞遠思
幸有一壺清酒且來閑語希夷

旅夜聞笛

長笛起誰家秋涼夜漏賒一聲來枕上孤客在
天涯木末風微動窻前月漸斜暗牽詩思苦不
獨落梅花

送紹明上人之毗陵

忽起毗陵念飄然不可留聽蟬離古寺携錫上
扁舟月出沙汀冷風高葦岸秋回期端的否千
里路悠悠

再到山陽尋故友不遇二首

維舟登野岸因訪故人居亂後知何處荆榛匝
敝廬

欲問當年事耕人都不知空餘堤上柳依舊自
垂絲

寄廬山簡寂觀重道者

憶昔采芝廬岳頂清宮常接絳霄人玉書閑展

二首二字旁注

石樓曉瑤瑟醉彈琪樹春唯恨仙桃遲結實不
憂滄海易成塵似醒一夢歸凡世空向彤霞寄
夢頻

思湓渚舊居

昔歲曾居湓水頭草堂吟嘯興何幽迎僧常踏
竹間蘚愛月獨登溪上樓寒翠入簷嵐岫曉冷
聲縈枕野泉秋從拘官路無由到昨夜分明夢
去遊

思胸陽春遊感舊寄柴司徒五首

王孫昔日甚相親共賞西園正媚春醉卧如茵

仍作官

五首二字旁注

芳草上覺來花月影籠身

煙迷芳草正綿綿藉草傳杯似列仙暫輟笙歌

且聯句含毫花下破香箋

南陌風和舞蝶狂惜春公子戀斜陽高歌飲罷

將迴轡衣上花兼百草香

春郊飲散暮雲收却引絲簧上翠樓紅袖歌長

金竿亂銀蟾飛出海東頭

昔年常接五陵狂共飲花間數十場別後或驚

如夢覺音塵難問水茫茫

泉

潺潺青嶂底來處一何長漱石苔痕滑侵松鶴
夢涼泛花穿石塢瀉月下蓮塘想得歸何處天
涯助渺茫

題徐立教池亭

名士池塘好塵中景恐無年來養鷗鷺夢不去
江湖泉脉通深澗風聲起短蘆驚魚跳一作藏藻荇
戲蝶上菰蒲泛泛容漁艇閑閑載酒壺漲痕山
雨過翠積岸苔鋪花影沈波底煙光入座隅曉
香憐杜若夜浸愛蟾蜍步逸心難厭看吟興不
辜憑君命竒筆爲我寫成圖

遙賦義興泉水

見說靈泉好潺湲興莫窮誰當秋霽後獨聽月
明中濺石苔花潤隨流水葉紅何當化霖雨濟
物顯殊功

和毘陵糾曹昭用見寄

決獄多餘暇冥搜萬象空卷簾疎雨後鎖印夕
陽中還往多名士編題尚古風宦途知此味能
有幾人同

貽毗陵正勒禪院奉長老

隨緣駐餅錫心已悟無生默坐煙霞散閑觀水

月明竹深風倍冷堂迴磬偏清願作傳燈者忘
言學淨名

舟次吉水逢蔡文慶秀才

別後音塵斷相逢又共吟雪霜今日鬢煙月舊
時心艤棹夕陽在聽鴻秋色深一樽開口笑不
必話升沈

新喻縣偶寄彭仁正字

經年離象魏孤宦在南荒酒醒公齋冷雨多歸
夢長志難酬國澤術欠致民康吾子應相笑區
區道未光

和彭正字喜雪見寄

千門欣應瑞偏稱上樓看密灑虛窻曉狂飄大
野寒園深宜竹樹一作栢簾卷洽盃盤已作豐年兆
黎民意盡安

海上和柴軍使清明書事

清明時節好煙光英傑高吟興味長捧日即應
還禁衛當春何惜醉胸陽千山過雨難藏翠百
卉臨風不籍香却是旅人悽屑甚夜來魂夢到
家鄉

壬申歲承命之任淦陽再過廬山國學

感舊寄劉鈞明府

三十年前共苦心囊螢曾寄此煙岑讀書燈暗
嫌雲重搜句石平憐蘚深各歷官途非聚散幾
看時一作流輩或浮沈再來物景還依舊風冷松高
猿狄吟

留題胡參卿秀才幽居

竹蔭庭除蘚色濃道心安逸寂寥中扣門時有
棲禪客醜一作澆酒多招采藥翁江近好聽菱芡雨
徑香偏愛蕙蘭風我慙名宦猶拘束脫屣心清
未得同

放鷺鷥

池塘多謝久淹留長得霜翎放自由好去蒹葭
深處宿月明應認舊江秋

柳絮

年年三月暮散亂雜飛花雨過微風起狂飄千
萬家

蚤春

一種和風至千花未散一作放妍草心并柳眼長是
被恩先

春雲

月明竹深風倍冷堂迴磬偏清願作傳燈者忘
言學淨名

舟次吉水逢蔡文慶秀才

別後音塵斷相逢又共吟雪霜今日鬢煙月舊
時心艤棹夕陽在聽鴻秋色深一樽開口笑不
必話升沈

新喻縣偶寄彭仁正字

經年離象魏孤宦在南荒酒醒公齋冷雨多歸
夢長志難酬國澤術欠致民康吾子應相笑區
區道未光

和彭正字喜雪見寄

千門欣應瑞偏稱上樓看密灑虛窻曉狂飄大
野寒園深宜竹樹一作栢簾卷洽盃盤已作豐年兆
黎民意盡安

海上和柴軍使清明書事

清明時節好煙光英傑高吟興味長捧日即應
還禁衛當春何惜醉胸陽千山過雨難藏翠百
卉臨風不籍香却是旅人悽屑甚夜來魂夢到
家鄉

壬申歲承命之任淦陽再過廬山國學

感舊寄劉鈞明府

三十年前共苦心囊螢曾寄此煙岑讀書燈暗
嫌雲重搜句石平憐蘚深各歷官途非聚散幾
看時一作流輩或浮沈再來物景還依舊風冷松高
猿狄吟

留題胡參卿秀才幽居

竹蔭庭除蘚色濃道心安逸寂寥中扣門時有
樓禪客一作醜酒多招采藥翁江近好聽菱芡雨
徑香偏愛蕙蘭風我慙名宦猶拘束脫屣心清
未得同

放鷺鷥

池塘多謝久淹留長得霜翎放自由好去蒹葭
深處宿月明應認舊江秋

柳絮

年年三月暮散亂雜飛花雨過微風起狂飄千
萬家

蚤春

一種和風至千花未散一作放妍草心并柳眼長是
被恩先

春雲

陰去爲膏澤晴來媚曉空無心亦無滯舒卷在
東風

送姚端秀才遊毘陵

毘陵嘉景太湖邊才子經遊稱少年風弄青帘
沽酒市月明紅袖采蓮船若邪罨畫應相似
若邪溪名
陵在毘越岫吳峯盡接連此去高吟須早返廣寒丹
桂莫遷延

和胸陽載筆魯裕見寄

燕臺多事好開顏相許論文淡薄閒飲興共怜
芳草岸吟情同愛夕陽山露濃小徑蛩聲咽月

冷空庭竹影閑何事此時攀憶甚與君俱是別
鄉關

叙吟二首

往哲搜羅妙入神隋珠和璧未爲珍而今所得
慙難繼謬向平生著苦辛
成癖成魔二雅中每逢知己是亨通言之無罪
終難厭欲把風騷繼古風

梅花

群木方憎雪開花長在先流鶯與舞蝶不見許
因緣

冬中書懷寄維貞太師

自別吾師後風騷道甚孤
雪霜侵鬢髮音信隔
江湖擾擾悲時世悠悠
役夢途向公期盡節多
病怕傾壺賤跡雖慙滯
幽情忍使辜詩成天外
句碁覆夜中圖落壁燈
花碎飄窓雪片麤煮茶
燒栗興早晚復圍爐

獻中書潘舍人

運叶半千數天鍾許國臣
鵬霄閑羽翼鳳闕演
絲綸顧問當清夜從容
向紫宸立言成雅誥正
意叙彞倫朴素借前哲馨
香越搢紳褒辭光萬

真作津

代優旨重千鈞公退誰堪接
清閑道是鄰世間
身屬幻物外意通真
弔往兼春夢文高賦復新

舍人有弔往文
春夢賦行于世

琴彈三峽水屏畫十洲
春庭冷鋪苔

色池寒浸月輪竹風來枕簟
藥氣上衣巾茶譜
傳溪叟棊經受羽人清虛雖
得趣獻替不妨陳
梓杞呈材後神僊入侍頻孤
寒皆有賴中外亦
同欣有士曾多難無門得望
塵忙忙罹險阻往
往耗精神尋果巢枝願終全
負米心遭逢敦孝
治蹇塞值通津最慶清朝祿
還沾白髮親甘柔
心既遂虛薄報何因遠宦聯
綿歷卑棲夙夜勤

仍作棲

良時空愛惜末路每悲辛骨立駒猶病顏凋女
尚貧而今借顧遇尺蠖願求伸

碧雲集卷下

壬子三月十八日借郵考先藏宋本校記

沈子封前輩藏鈔本亦有崇禎甲申幽吉堂主人題識蓋錢亦亦
亦校閱取勘一過頗有放處出宋本之外者因以綠筆臨之與宋本同
者加圈識於旁異者記於上方以別之 甲寅十月雪郵後一日沈姑記

伍喬詩集

冬日送水

一作冬日
送人

去去天涯無定期瘦僮羸馬共依依暮煙江口
客來絕寒葉嶺顛人往稀帶雪野風吹旅思入
雲山火照行衣釣臺吟閣滄洲在應為初心未
得歸

聞杜牧赴闕

舊隱匡廬一草堂今聞攜策謁吾皇峽雲難卷
從龍勢古劍終騰出土光開翅定期歸碧落濯
纓寧肯問滄浪他時得意交知仰莫忘裁詩寄

釣鄉

僻居秋思寄故人

一作故反

門巷秋歸更寂寥
雨餘開砌下蘭苗
夢迴月夜蟲吟壁
病起茅齋藥滿瓢
澤國舊游關遠思
竹林前會負佳招
身名未立猶辛苦
何許流年晚鬢焦

一作馬

題西林寺水閣

竹翠苔花遶檻濃
此亭幽致詎曾逢
水分林下清泠派
山峙雲間峭峻峯
怪石夜光寒射燭
老杉秋韻冷和鐘
不知來往留題客
誰約重尋蓮

社蹤

寄落星史虛白處士

白雲峯下古溪頭
曾與提壺爛熳游
登閣共看彭蠡浪
圍爐同憶杜陵秋
碁玄不厭通宵筭
句妙多容隔歲酬
別後相思時一望
暮山空碧水空流

林居喜崔三博遠至

幾日區區在遠程
晚煙林徑喜相迎
姿容雖有塵中色
巾屨猶多嶽上清
野石靜排爲坐榻
溪茶深煮當飛觥
留連話與方經宿
又欲攜書別

我行

僻居酬友人

僻居雖愛近林泉幽徑閑園一作籬一作薛連向竹掩扉
隨鶴息就溪安石學僧禪古琴帶月音聲在一作山
果經霜氣味全多謝故交憐朴野隔雲時復寄
佳篇

觀華夷圖

別手應難及此精須知攢簇自心靈始於毫末
分諸國漸見圖中列四溟關路欲伸通楚勢蜀
山俄聳入秦青筆端盡現寰區事堪把長懸在

戶庭

廬山書堂送祝秀才還鄉

東書辭我下重巔相送同臨楚岸邊歸思幾隨
千里水離情空寄一枝蟬園林到日酒初熟庭
戶開時月正圓莫使蹉跎戀踈野男兒酬志在
當年

暮冬送何秀才毗陵

匹馬嘶風去思長素琴孤劍稱戎裝路途多是
過殘歲杯酒無辭到醉鄉雲傍水村凝冷片雪
連山驛積寒光毗陵城下饒嘉景迴日新詩應

滿堂

僻居謝何明府見訪

公退琴堂動逸懷
閑披煙靄訪微才
馬嘶窮巷蛙聲息
轍到衡門草色開
風引柳花當坐起
日將林影入庭來
滿齋塵土一床蘚
多謝從容水飯迴

龍潭張道者

碧洞幽巖獨息心
時人何路得相尋
養生不說憑諸藥
適意惟聞在一琴
石徑掃稀山蘚合
竹軒開晚野雲深
他年功就期飛去
應笑吾徒多

苦吟

遊西山龍泉禪院

一作禪院

壘巘層峰坐可觀
枕門流水出雲端
曉鐘聲徹洞溪遠
夏木影籠軒檻寒
幽徑乍尋衣履潤
古堂頻宿夢魂安
因嗟城郭營營事
不得遊茲空鬢殘

晚秋同何秀才溪上

閑步秋光思杳然
荷藜因共過林煙
期收野藥尋幽路
欲採溪菱上小船
雲吐晚陰藏霽岫
柳含餘靄咽殘蟬
倒尊盡日忘歸處
山磬數聲敲

暝天

送江少府授延陵後寄

五老雲中勤學者遇時能不困風塵束書西上
謁明主捧檄南歸慰老親別館友朋留醉久去
程煙月入吟新莫因官小慵之任自古鸞棲有
異人

觀山水障子

功績精妍世少倫圖時應倍用心神不知草木
承何異但見江山長帶春雲勢似離巖底石浪
花如動岸邊蘋更疑獨泛漁舟者便是其中舊

隱人

宿瀟山

一入仙山萬慮寬夜深寧厭倚虛欄鶴和雲影
宿高木人帶月光登古壇芝朮露濃溪塢白薜
蘿風起殿廊寒更陪羽客論真理不覺初鐘叩
曉殘

九江旅夜寄山中故人

弱柳風高遠漏沉坐來難便息愁吟江城雪盡
寒猶在客舍燈孤夜正深塵土積年粘旅服關
山無處寄歸心此時遙羨閑眠侶靜掩雲扉向

一林

遊西禪

遠岫當軒列翠光高僧一衲萬緣忘碧松影裏
地長潤白藕花中水亦香雲自雨前生淨石鶴
於鐘後宿塵廊遊人戀此吟終日盛暑樓臺早
有涼

寄史處士

長羨閑居一水湄吟情高古有誰知石樓待月
橫琴久漁浦經風下釣遲幽圃落花多掩徑舊
山殘燒幾侵籬松門別後無消息早晚重為清

菴期

一作重為
清話期

伍喬詩集

乙未八月初六日校明鈔本竟無一異字沈林

乙卯冬月初五日校李澹華鈔本得異字二十餘字補
詩一首錄在右沈林

寄張學士洎

不知何處何消夏公退携壺即上樓職事久參侯
伯幕夢魂長繞帝王州黃河向晚迎軒翠影水雷春
繞檻流遙想玉堂多暇日花時誰伴出城遊

王周詩集

蝻子賦

并序

蝻子之下有螟子螟子之下有浮塵子三者異乎皆狀小而黑類一也世云巴蛇鱗介中微蟲所變耳三伏間晝飛夜息啞啄人肌膚動爲瘡疔能飛不見其翼能齧不見其口微眇之極雖縝密衣服亦可通透莊生蠲螟之說近之也至微之蟲豸詩獨無蝻子故作賦以廣之

蟲之至微名之曰蝻信乎蟣之別品謂後虱之餘裔君巢蚊之異類結搏牛之深契附諸鬱烝

產彼蕪穢張華之識何以辨其兩翼離婁之明
何以見其長喙伺暑絃之漏露萃豐肌而睥睨
默焉而至暗然而噬人之至靈何闕爾之所衛
人之至剛何反爾之所制狀斯咄咄籲於造物
何不恣蛇虺之毒必當與之爲避何不張虎豹
之口不敢與之爲忽豈其食人之膏血資已之
肥腴念膚體之何毀痛瘡痂之難沒吾將擷楸
葉以爲薪俾爾之銷骨者也

泊姑孰口

杳杳金陵路難禁欲斷魂雨晴山有態風晚水

無痕遠色千檣岸愁聲一笛村如何遣懷抱詩
畢自開尊

湖口縣

柴桑分邑載圖經屈曲山光展畫屏最是蘆洲
東北望人家殘照隔煙汀

岳州衆湖阻風二首

衆湖湖口繫蘭船睡起中餐又却眠風伯如何
解迴怒數宵檣倚碧蘆煙

其二

偶繫扁舟枕綠莎旋移深處避驚波曉來閑共

漁人話此去巴陵路幾多

問春

遊絲垂幄雨依依
枝上紅香片片飛
把酒問春因底意
為誰來後為誰歸

春苔

花枝千萬趁春開
三月攔珊即自回
剩向東園種桃李
明年依舊為君來

西塞山

今謂之道士磯即興國軍大台縣所隸也

西塞名山立翠屏
屏濃嵐嵐橫入半江
青千尋鐵鎖無由問
石壁空存道者形

匹婦頑然莫問因
匹夫何去望千春
翻思岵岵傳詩什
舉世曾無化石人

使風

風起即千里風回翻
問津沉思宦遊者
何啻使風人

石首山

荆江東南流至此山即西北流下川峽澤之大首有此因而為名也

首出崔嵬占上游
迴存濃翠向荊州
空聞別有回山力
却見長江曲尺流

金口步

在江北漢陽軍下必鐵也

兩山鬪咽喉羣石直
齧牙齒行客無限愁
橫吞一

江水

采桑女二首

渡水采桑歸蠶老催上機
扎扎得盈尺輕素何人衣

其二

採桑知蠶飢投梭惜夜遲
誰誇羅綺叢新畫學月眉

渡溪

渡溪溪水急水濺羅衣
濕日暮猶未歸盈盈水邊立

落葉

素律鑠欲脆青女妬復稀
月冷天風吹葉葉乾紅飛

宿疎陂驛

秋染棠梨葉半紅
荊州東望草平空
誰知孤宦天涯意
微雨蕭蕭古驛中

再經秭歸二首

總角曾隨上峽船
尋思如夢可悽然
夜來孤館重來宿
枕底灘聲似舊年

其二

五言詩集
稀歸城邑昔曾過舊識無人奈老何獨有淒清
難改處月明聞唱竹枝歌

霞

拂拂生殘暉層層如裂緋天風翦成片疑作仙
人衣

巫山公署壁有無名山戲書二韻

施州路一百八盤

南陵直上路盤盤平地凌雲勢萬端堪笑巴民
不厭足更嫌山少畫山看

道院

白日人稀到簾垂道院深雨苔生古壁雪雀聚

寒林忘慮憑三樂消閑信五禽誰知是官府煙
縷滿鑪沉

會噲岑山人

戊寅仲冬六日

渝州江山忽相逢說隱西山最上峯略坐移時
又分別片雲孤鶴一枝筇

巴江

巴江江水色一帶濃藍碧仙女瑟瑟衣風梭晚
來織

小園桃李始花偶以成詠

桃李裁成艷格新數枝留得小園春半紅半白

無風雨隨分天容解笑人

公居

公居門館靜旅寄萬州城山共秋煙紫霜并夜
月清無愁干酒律有句入詩評何必須林下方
馳吏隱名

富池口

扁舟閑引望望極更盤桓山密礙江曲雨多饒
地寒短莎煙冉冉驚浪雪漫漫難寫愁何限鄉
關在一端

夔州病中

隱几經旬疾未痊孤燈孤驛若爲眠郡樓昨夜
西風急二更籌到枕前

題廳壁

永日無他念孤清吏隱心竹聲并雪碎溪色共
煙深數息閑憑几緣情默寄琴誰知同寂寞相
與結知音

過武寧縣

十月十九日

行過武寧縣初晴物景和岸回驚水急山淺見
天多細草濃藍潑輕煙匹練拖晚來何處宿一
笛起漁歌

路次覆盆驛

曾上青泥蜀道難，架空成路入雲寒。如何却向巴東去，三十六盤天外盤。

藕池阻風寄同行撫牧裘駕

船檣相望荆江中，岸蘆汀樹煙濛濛。路間隄缺水如箭，未知何日生南風。

無題

二首

冰雪肌膚力不勝，落花飛絮遶風亭。不知何事鞦韆下，蹙破愁眉兩點青。

梨花如雪已相迷，更被驚烏半夜啼。簾捲玉樓

人寂寂，一鈎新月未沉西。

泊巴東

偶泊巴東古縣前，宦情鄉思兩綿綿。不堪蠟炬燒殘淚，雨打船窗半夜天。

道中未開木杏花

粉英香萼一般般，無限行人立馬看。村女浴蠶桑柘綠，枉將顏色忍春寒。

西山晚景

公局长清淡，池亭晚景中。蔗竿閑倚碧蓮朵，靜掩紅半引鸞鸞。月微生，颼颼風無思，復無慮。此

味幾人同

和

一片殘陽景朦朧淡月中蘭芽紆嫩紫梨頰抹
生紅琴阮資清格冠簪養素風煙霄半知已吏
隱少相同

齒落詞

已卯至庚辰仲夏晦之暮吾齒右排上一齒脫
而去呼吸缺吾防咀嚼欠吾助年籥惜不返日
馭走爲臺蠹脣亡得無寒舌在從何訴輔車宜長
依髮膚可增懼不須考前古聊且爲近喻有如

雲中雨雨散絕回顧有如枝上葉葉脫難再附
白髮非獨愁紅顏豈私駐何必鬱九回何必牽
百慮開尊復開懷引筆作長句

淘金磧

畫船晚過淘金磧不見黃金惟見石猶恐黃金
價未高見得錙銖幾多力

施南路偶書

俗謂太市嶺即音之訛近
百歲再去秭歸寄家處

大石嶺頭梅欲發南陵坡上雪初飛苦無酒解
愁成陣又附蘭橈向秭歸

大石嶺驛梅花

已卯十一月十三日

仙中姑射接瑤姬成陣清香擁路岐半出驛牆
誰畫得雪英相倚兩三枝

贈怱師

水中有片月照耀嬋娟姿庭前有孤栢竦秀歲
寒期堅然物莫遷寂焉心爲師聲發響必峇形
存影即隨雪花安結子雪葉寧附枝蘭死不敗
香井寒豈生澌晨鑪煙裊裊病髮霜絲絲丈室
冰凜冽一衲雲離披顧此名利場得不慙冠綏

遊仙都觀

冷杉枯栢路盤空毛髮生寒略略風兩漢眞仙

在何處巡香行遶藥珠宮

誌峽船具詩

并序

峽山之船與下之船大抵觀浮葉而爲之其狀
一也執而爲用者或狀殊而用一或狀同而名
異皆有謂也下之船有檣有五兩有帆所以使
風也尾有拖傍有棚上者以其山曲水急下有
石皆不可用也狀直如艣前後各一者謂之梢
船之斜正欹側爲船之司命者梢類拖其狀殊
而船之便於事者悉不如梢作梢詩檣槳橈棹
拔使其進而無退利涉川澤爲船之陳力者艣

幾槩類其狀同而異名也在船有力悉不如艣
作艣詩峽水湍浚激石忽發者謂之潰沍狀而
漩者謂之腦岸石壁立潰之忽作篙力難制以
其木之堅韌竿直戟其首以竹納護之者謂之
戩竹爲綫而勾其戩者謂之納爲船之良輔者
戩與篙狀殊而用一也在船獨出悉不如戩作
戩詩崖石如齒非麻杲紉繩之爲前牽取竹之
筋者破而用杲爲韌以續之以備其牽者謂之
百丈繫其船首者謂之陽紐牽之者擊鼓以號
令之人聲灘亂無以相接所以節動止進退牽

之防礙者謂之下緯濟其不通爲船之先進者
杲與竹狀殊而用一也在船先容悉不如百丈
作百丈詩噫古人觀物因事爲誌者甚多也予
祇命憲局沿沂巴賓抵瞿塘耳目熟於長年三
老輩矣船具之於船有力者作詩以稱之庶幾
魯望茶經者也俾系其末詩云

梢

制之居首尾俾之辨斜正首動尾聿隨綫取正
爲定有如提吏筆有如執時柄有如秉師律有
如宣命令守彼方與直得其剛且勁既能濟險

難何畏涉遼負招招俾作主汎汎實司命風烏
愧斟酌畫鷁空輝映古人存豐規猗歟聊引證
用之大曰艣冠乎小者楫通津既能濟巨浸即
橫涉身之使者頰虎之拏者爪魚之撥者鬣弩
之進者筴此實為相須相須航一葉

艣

戩

箭飛峽中水鋸立峽中石峽與水為隘水與石
相擊瀆為生險艱聲發其霹靂三老航一葉百
丈空千尺蒼黃徒爾為倏忽何可測篙之小難

制戩之獨有力猗嗟戩之為彬彬堅且直有如
用武人森森轟戈戟有如敢言士落落日曾臆
極危居坦夷濟險危兢惕誌彼哲匠心俾其來
者識

百丈

少嘗侍先君餘閑誦白氏始得入峽詩深味作
詩旨云有萬仞山云有千丈水自念坎壈時尤
多兢慎理山東峽如口水漱石如齒孤舟行其
中薄水猶坦履孱顏屹焉立洶涌勃然起百丈
為前牽萬險即平砥破之以筴筴留續之以麻梟

礪之堅以節引之直如矢杼軸連半空長短隨
兩溪鐵鎖在馳名錦纜謾稱美長繩豈能繫朽
索何足擬苟非綫之爲胡可力行此

早春西園

引步攜筇竹西園小徑通雪歌梅帶綠春入杏
梢紅靜意崖穿溜孤愁笛破空如何將此景收
拾向圖中

金盤草詩

生寧江巫山
南陵林木中

今春從南陵得草名金盤金盤有仁性生在林
一端根節歲一節其根一年生一節人
採而服可解毒也食之甘而酸風俗

競採掇俾人防急難巴中虵虺毒解之如走丸

巨葉展六出軟幹分長竿搖搖綠玉活裊裊香

荷寒世云暑酷月鬱有神物看

夏中採之則必有巨
蛇衝足人即難採

天之

產於此意欲生民安今之爲政者何不反此觀
知彼苛且猛慎勿虐而殘一物苟失所萬金惟
可歎莫並蒿與萊豈羨芝及蘭勤渠護根本栽
植當庭欄寄言好生者休說神仙丹

和程刑部三首

公會亭

公事公言地標名信必臧江山如得助談笑若

爲妨均賦鄉原肅詳刑郡邑康官箴居座右夙
夜筭難忘

碧鮮亭

颼颼籠清籟蕭蕭鏤翠陰向高思盡節從直美
虚心迴砌滋蒼蘚幽窓伴素琴公餘時引步一
徑靜中深

清連閣

照影翻窓綺層紋滉額波絲青迷岸柳茸綠蘸
汀莎片雲翹野鷺孤香卷嫩荷凭欄堪入畫時
聽竹枝歌

自喻

予念天之生生本空踈器五歲稟慈訓憤悱讀
書志七歲辨聲律勤苦會詩賦九歲執公卷侗
儻千名意乞薦鄉老書幸會春官試折桂愧巍
峩依蓮何氣味性拙絕不佞才短無餘地前年
會知已薦章實非據寧見民說平空荷君恩寄
瞿唐抵巴渝往來名攬轡孤舟一水中艱險實
可畏羣操百丈牽臨難無苟避瀆向江底發水
在石中沸槌鼓稱打寬繫紉呼下緯善惡胡可
分死生何足諱騎衡與垂堂非不知前喻臨淵

與履冰非不知深慮我今縻搢紳善地誰人致
城狐與社鼠巧佞誰從庇奴顏與婢膝醜直誰
從媚妻兒負限越容顏幾憔悴致身霄漢人吃
噉盡賢智

巫山廟

廟前溪流潺潺廟中脩竹聲珊珊襄王一夢
杳難問晚晴天氣歸雲閑

下瞿塘寄時同年

春寒天氣下瞿塘大壤溪前柳線長須信孤雲
似孤宦莫將鄉思附歸艍

和杜運使巴峽地暖節物與中土異黯

然有感詩三首

隨柳參差破綠芽此中依約欲飛花春光足處
傷離思何況歸期未有涯

始看菊蕊開籬下又見梅花寄嶺頭攬轡巴西
官局冷幾憑春酒沃鄉愁

花品姚黃冠洛陽

花品云以
姓紀名也

巴中春早羨孤芳不知

別有栽培力流詠新詩與激昂

施南太守以猿兒爲寄作詩荅之

得之黔中
頭生即白

虞人初獲酉江西長臂難將意馬齊今日未啼

頭已白不堪深入白雲啼

巫廟

巴水走若箭峽山開如屏洶湧匹練白齒萃濃
藍青崖空蓄雲雨灘惡驚雷霆神宅幽邃廟
貌橫杳冥隱約可一夢縹緲餘千齡名利有所
役舟楫無暫停悉宰垂盼響祠禱希安寧鷓鴣
爾何物飛飛來廟庭紛紛颺寥次遠近隨虛舲
鐵石礪觜爪金碧輝光翎翔集託陰險鵠啄貪
羶腥日既恃威福歲久為精靈依草與附木誣
詭殊不經城狐與社鼠鎖細何足聽況乎人假

人心闊吞滄溟

王周詩集

乙卯十一月初四日取近合鈔唐詩校此卷得異
字十餘皆絕在卷中多詠川峽景物讀之恍憶
戊戌庚子間在瞿唐灩澦中向三老長年呼噪
聲也 沈林記

